

रोमीरालाई

पावलए परींद ओरायो चिथी

आव चिथी रोम सहरलाव मन्दलीए जूनी पावलए ओसरो ज़। नो पो राज्या भरिलाव राजधानी उलिज़्याव। नल ख्वा ख्वा यहूदी धर्म मानिज़्यावर हुद मोसाए ओकानुन दाद वाज़ परमेस्वरस खैन्या ताज़्या है यालिज़्याव (रोमी २:१७-२६; ६:३०-३३)। है जैद आव चिथील पावलए येसु ख्रीसलाई युं सुहुपन्यानी वाज़ पाप भरी क्यालिसद परमेस्वरस खैन्या ताज़्या लिद नो यापाँलाई उल्लैद ओरायो रैःज़्या (३:२१-२८)। मिं भरी सु ज़ धर्मी यामातावए (३:६-२०) नो येम यहूदीर तादी ब, छुत जातलावर तादी ब प्राइँ मिंराए जूनी ज़ (१:१६-१७; ३:२६-३१)। है जैद ननी ज़ छैव पुरुस दैद माचाव भरिनी फुर्सुल तान्या ताज़्या (६:१-८; ३६)।

पावलए ओयेन ख्रीसए ओपाँ सथैन्या

१ डा पावल, येसु ख्रीसए ओनोकोर, परमेस्वरए चाव ओथा सथैन्यात ओसाची खतैसिउ डालिज़्या। २नो चाव था परमेस्वरए 'यान्या डाले' लिद अगमबत्काराए यासरो धर्मसास्त्रल ड़ादा ज़ याका दाद ओनैज़्याव। ३नो पाँ ओज़ा येसु ख्रीसए उजूनी ज़। नो दाऊदए

ओथोल ज़ मिं मिन्सिद जर्मिके।

४फरी छैव पुरुसए ओसक्तीए गोप्रभु येसु ख्रीसलाई सिउनी ओसोचोइवए परमेस्वरए ओज़ा ज़ थोरिके। ५है जैद डा गोप्रभुए उमिननी ज़ यहूदीराकिन छुत जातलाव मिंरालाई ओल ओपाँत उघुरिउर जैद, यायुं सुहुपदचान्याए जूनी नोए ओल्योनी ज़ असिकर दैद ओसाची तान्या हक ब दैद डानै। ६जे मनी येसु ख्रीसए उमींर तान्या

खुल्सिउर जेलिज़्या। ७ है जैद जे परमेस्वरए उयुंलाव मिताव रोमलाव छैव उमीरालाई आव चिथी परींद डायचिज़्या। परमेस्वर गेबाबु सोनो गेप्रभु येसु ख्रीसनी जेल्योदा नियुं गराँद जेरुं होलाँ जैद ओयाचिरक।

पावल याल्योदा हुव ओपैज़्याव

८ प्राइरानी डात आव तोबो पाँ लिज़्या — जे परमेस्वरए ओपाँत जेरुं जेसुहुबो संसार भरिल प्राइँदा ज़ थास्द ले। है जैद डा जेजूनी परमेस्वरलाई पोंखारिद येसु ख्रीसनी धन्याबाद चरैःव ज़ डानैज़्या। ९ ओज़ाए ओयेनत बनै जाँगरस ओसेवा डादोज़्याव परमेस्वरए ओडाक जेलाई मनी खर्क ज़ डामामेंःचिए। आव पाँत ओल ज़ साची लिज़्या। १० परमेस्वरए उयुं ओताकिन डा आथ पाला जेल्योदा हुव डादैक' लिद परमेस्वरलाई बिन्ती चरैःव ज़ डानैज़्या। ११ डा जेल्योड जेलाई थोरिउ जैन्याए जूनी परमेस्वरनिकाव काता असिकर याव डादैकिन ताखेहो लिद जेस दैसिन्या बनै युं डादोज़्या। १२ डा जेल्योक हुद जेस दैसिउ डादैकिन गे तखेप्ट ज़ गेरुं सभेंःसिन्या गेले — जे डा डाल्योनी, डा जे जेल्योनी। १३ आव ब सैंच्यो

डानैँ डामेर, डा जेल्योदा कुधु पाला ज़ हुन्या डापैके, खाली काता काताराए माधाःद हुव डामादैके। जेल्योडाव डायुं ते इताव ज़ ओल्यो — किताव पो पोड छुत जातलाव मिँरालाई परमेस्वरए ल्योदा हुन्या डाराजैके, हिताव ज़ जे जेल्योड मनी तोबो नेब्लो डाराजैधुकिन ताखेहो लिद बनै युं डादोज़्याव। १४ डा घेप्पा जिम्ज़ार, सैंवर मासैंवर, जो मितावरालाई तादी ब चाव था सथैन्या कर ज़ लिज़्या। १५ है जैद डा जे रोमल लिज़्यावरालाई मनी चाव था सथैन्या युं डादोज़्या।

परमेस्वरस खैन्या येम

१६ डा ख्रीसए चाव ओथा सथैन्या डालाज माहुड। यहूदीर तादी ब, छुत जातलावर तादी ब आव पाँत यारुं हुपज़्यावरालाई परमेस्वर-निकाव साःरो जुनी दैन्या सक्ती लिज़्या। १७ ननी ज़ परमेस्वरए मिँरालाई ओलस ओरासखैज़्याव येम ब सतैंसिउ लिज़्या। नो येम ओजरानी उतुपाड पै गेरुं गेसुहुबोनी वाज़ लिज़्या। धर्मसास्त्रल मनी इताव सर्सिउ लिज़्या,

“उयुं हुपद परमेस्वरस खैव मिँ वाज़ बाँचिज़्या।”

परमेस्वरए ओड़ाक काता निउँ ज़
माले

१८मिराए यादोव पापत स्रोनो अधर्म यादोज्याव येन भरित परमेस्वरए ओसजा सरैःसिउ लिज्या। नोराए यार्युँल माचाव वाज़ नैद परमेस्वरए साचो ओपाँलाई ब वैज्यार। १९नोराए यार्युँल परमेस्वरए उजूनी ते डादाकिन ज़ सैंद यानैज्याव, काराव ल्यो ताकिन ओल परमेस्वरए ज़ सतैंद नैद यायो। २०परमेस्वरए आव संसार ओजैज्यावकिन ज़ ‘ओगेर उगुनर स्रोनो खर्क ज़ माखेम्न्या ओसक्तीर आवर ज़’ लिन्या प्राइँए ज़ सैंद नैर। ओललाई यामारैःधुदी ब ओदोज्याव येननी ज़ रैःज्या। है जैद सुलाई ज़ ‘आव भरी गेमासैँए’ लिन्या काता निउँ ज़ माले। २१हिताव सैंज्यावत ब परमेस्वरलाई नैदद्याव परिन्या मान ब नैद माएर, धन्याबाद ब माचरैःर। नोराए भन अनाकलाव पाँर ससैद यार्युँनी काता ज़ माहुन्या तानाकेर। २२नोर, ‘गे बनै सैंन्यार गेलिज्या’ है यालिज्यावत ब काता ज़ मासैंन्यार ताकेर। २३बनै ज़गै मगैव, उजिउँनी लिज्याव, खर्क ज़ माखेम्ज्याव परमेस्वरए ओपोल भन जै जन्तु,

बाज़ा बिज़ा, रूइज़ा वान्ज़ा, मिराए अङ्ग्या जैद, नोराए यासेवा दोज्यार।

२४है जैद परमेस्वरए ‘आवर कै जैद ब माताके’ लिद यामन लागिउ येनदा ज़ यारास्क्यो। हाःकिन नोर भन या याल युँ माजामो येनर वाज़ दाद याइज्यात याज़ भाःज्यार। २५सैंज्यावत ब परमेस्वरनिकाव साचो ओपाँलाई रास्द, होए ओपोल भन धुतनी ताव पाँलाई रैद, हो ज़ साचो जैकेर। एकम्न्या ओमान नैदद्याव परिन्या प्राइँ जैज्याव परमेस्वरलाई माभैःद ओसेवा ब मादाद, भन ओल ओराजैवराए यासेवा ज़ दोनाकेर।

२६है जैद परमेस्वरए नोरालाई लाज मोर्नो येनदा ज़ यारास्क्यो। ननी ज़ मेंमाराए मनी दाव परिन्या येनलाई रास्द या याल युँ माजामो येन ज़ दोनाकेर। २७हो मिताव ज़ खेपाराए मनी मेंमारास माताद भन या याल ज़ यार्युँ मानैधुद युँ माजामो येनर ब दोनाकेर। नितावराए यापाप याक्याँत याज़ भुगिरिज्यार।

२८नोराए परमेस्वरए ओमान नैदद्याव माभैःद यार्युँ बिप्यादा वाज़ याभाःवए परमेस्वरए नोरालाई ‘कुबानी यायेनदा ज़ घबाज्यारक’ लिद बिप्यादा ज़ यारास्क्यो। २९है जैद नोराए यायेन

जम्मा माचाव वाज्ज लिज्या — युंणी कुबातें हुन्या, लोभ दान्या, छुतलाई सोन्या, प्राइंत ज़ मी तून्या, मिं सैःन्या, इंसिन्या, धुतैद ज़्यान्या, छुलैं पुलैं दान्या, अर्काए उछींनी पाँन्या, ३० अर्काए उमिन बले-दयान्या, परमेस्वरलाई सोन्या, स०द सँ सँनी बँ बँ लिन्या, सघ्योःसिन्या, माचाहिउ बुद्धी कलैन्या, बाबु आमाए ओपाँ माभैःन्या, ३१ पत मुख्र जैसिन्या, सतत मालिन्या, युँ मानान्या, सुए ल्योदा ब युँ माजैन्या। ३२ निताव येन दाज्यावराए, ‘परमेस्वरए ओकानुननी सिन्या सजा ते दैव ज़ परिके’ लिन्या यासैज्यावत ब भन याजिउ नदा ज़ च्यो च्यो भाःज्यार। छुत निताव येन दोज्यावरास मनी बनै रेंद यापाँ तप्द याराएज्यार।

परमेस्वरए मिं रैंःद न्याय मादोव

२ है जैद जे छुतलाई वाज्ज ‘इताव हिताव’ है दाज्यावर जेलाई मनी परमेस्वरए ओड़ाक काता निउँ ज़ माले। जे नोरास जेयेन तोबो ज़ ओतावए नोराए यागलती थःरैद जेराएक जे जेगलती ब जे ज़ जेथःरैज्या। २ नितावराए याक्याँत परमेस्वरए ओसजा उहुरिज्याव ते

थिक ज़ है लिन्या गे गेसैज्या। ३ हिताव ताकिन जे छुतए ओगलती थःरैद जेएज्याव येन जे ब जेदोज्याव ताकिन परमेस्वरए ओसजानी कातानी उस्किउ जेदैरिज्याव? ४ सैं परमेस्वरए ओदयानी जेगलती भरी कुधु ज़ सहिद ओयाचिज्यावए, ‘गेलाई कैज़ ओमाजैसिज्याव ओल्यो’ है जेलिज्याव रो? परमेस्वरए ओदया ते बुरू, ‘कसा डाल्योदा यायुँ माफकैर’ लिद कीद नैचिज्याव लिन्या जे जेमासैज्याव रो? ५ जे ते भन माचाव जेदिउदीए ओल्योदा जेयुँ फकैव जेमाभैःवए, परमेस्वरए मिँरालाई न्यायस फाल्द ओसजा ओसतैरिज्याव छ्यामकावए जूंनी उरिस दुपो ज़ जेनैज्या। ६ परमेस्वरए हो छ्याम मिँरालाई सु सु यादोव मितावनी ज़ यान्या ले।

७ चाव येनत थःरिद ज़गै मगैवलाव माखेन्त्या जुनी खिम्ज्यावरालाई अजम्बरी जुनी याएरिज्याव। ८ फरी यालाई वाज्ज तान्या खिम्द साचो पाँलाई माभैःद माचाव येन दाज्यावराए याक्याँत परमेस्वरए उरिस थुद याएरिज्याव। ९ माचाव येन दाज्यावरालाई यहूदीर तादी ब, छुत जातलावर तादी ब बनै दुख

तान्या ले। १०चाव येन दाज्यावरालाई फरी, यहूदीर तादी ब, छुत जातलावर तादी ब असिक सोनो मान याद यायुं ब होलाँ जैदचान्या ले। ११परमेस्वरए मिं रँ:द मादोव, येन रँ:द दोज्याव।

१२है जैद परमेस्वरए ओकानुन सैदकाव पाप दोव भरी हो कानुननी ज़ फाल्सिरिज्यार। परमेस्वरए ओकानुन मासैदकाव पाप दोव भरिए बिनु कानुननी ज़ सजा दैरिज्यार। १३परमेस्वरए ओकानुन थैद वाज़ परमेस्वरए ओडाक सु ज़ धर्मी माथ०रिए। ओकानुन दाद वाज़ धर्मी थ०रिन्या ताए। १४परमेस्वरए ओकानुन मादैव छुत जातलाव मिंराए मनी परमेस्वरए ओकानुनलाव मिताव येनर यायुं स्यानी याज़ दान्या यासैवए नोराए मनी तोबो कानुन यादैव मिताव ज़ ताद ले। १५परमेस्वरए ओकानुन ते यायुंल ज़ सर्सिउ लिज्या। है जैद याज़ यायुंल छाप छाप दाद, 'आव ते चाव ज़ डादोके, आव ते माचाव ची डादोके' लिन्या याज़ सैज्यार। १६आव भरी परमेस्वरए मिंरालाई येसु ख्रीसनी ओराफाल्रिज्याव छचाम ज़ तारिज्या। डा डारासथैज्याव चाव था मिताव ज़, नो छचाम यायुंलाव मींसिउ पाँ भरी फाल्सिरिज्यार।

यहूदीर सोनो मोसाए ओकानुन

१७जे नलाव यहूदी तावर मोसाए ओकानुनत जेयुं हुप्ट, 'परमेस्वरए गेलाई वाज़ चाव रँ:सिज्याव' है ब जेलिज्याखेहो। १८नो कानुननी फरी चाव माचाव सैद, परमेस्वरए उयुंलाव मिताव दान्या येनर ब जेसैज्या। १९'यामी मारै:वरालाई दोरैज्यावर ब गे ज़, चुम चुमोल लिज्यावरालाई पलाँ जैदचाज्यावर ब गे ज़। २०साचो पाँ सोनो सैन्या भरिए ओथालन परमेस्वरए ओकानुनल गेदैवनी मुखरालाई गेरासुधारेज्या, मासैज्यावरालाई गेरापैज्या,' है जेलिज्या। २१है जैद जे छुतरालाई पैज्यावर जे जेमापैसिज्या नी? जे छुतरालाई 'कुन्या माताए' है दाज्यावर जे जेमाकुज्या नी? २२जे 'अर्काए ओज्याए ल्योदा बान्या माताए' है दाज्यावर जे जेमाबाज्या नी? जे अडग्या पुजात जेयुं माजाम्ज्यावर मन्दिरलाव अडग्यार कुद जेमारायो:ज्या नी? २३जे मोसाए ओकानुन जेदैवनी सघ्यो:सिज्यावर नो कानुन माभै:द परमेस्वरए उमिन जेमाबले:ज्या नी? २४जे मितावराए जेजूनी धर्मसास्त्रल इताव ब सर्सिउ लिज्या,

‘जे जेदोव हुनानी
छुत जातलाव मिंराए खार्ल
परमेस्वरए उमिन माचाव
थंरिके।’

२५ है जैद नो कानुनलाव पाँ जेदोकिन वाज़ नो यहूदी जैसिन्या क्यालन्या सरेस ओलेखा ल्यो लिज़्या। कानुनलाव पाँ जेमादोकिन ते नो सरेस जैसिद ब माजैसिउ स्यासोर जेलिज़्या। २६ हो मिताव ज़ फरी, क्यालन्या सरेस माजैसिउ छुत जातलाव मिंए कानुनलाव येन ओदोकिन, नो मिं सरेस माजैसिद ब जैसिउ स्यासो ज़ लिज़्या। २७ है जैद निताव क्याँताव सरेस माजैसिउ छुत जातलाव मिंए कानुनलाव येन ओदोकिन, नोए ज़ भन जे मिताव सरेस जैसिउ यहूदी जातलाव कानुन सैद ब मादोज्याव मिंरालाई जेपाहा भाःदयान्या ले। २८ पाखातावए वाज़ साचो यहूदी तान्या माताए। हिताव ज़ सतैन्याए जूनी वाज़ क्यालन्या सरेस जैसिउ ब साचो सरेस माःक। २९ साचो यहूदी तान्या युँल ज़ ताज़्या। साचो क्यालन्या सरेस ब युँल ज़ ताज़्या। नो सरेस ते पाखाताव कानुननी माताए, छैव पुरूसनी ज़ ताज़्या। निताव

मिं मिंराए ल्योनी ओमागनिसिदी ब परमेस्वरए ल्योनी ते गनिसिज़्या।

यहूदी तान्या ओलेखा ल्यो ज़

३ जे ते, ‘हो ची ताकिन्दा, गे यहूदी गेताव सोनो क्यालन्या सरेस गेजैसिउ अनाकलाव ज़ ची ओल्यो’ है जेलिज़्याखेहो। २ अनाकलाव ते माले, ओलेखा ल्यो ज़ लिज़्या। प्राइरानी उसं कताव आव ज़ — परमेस्वरए ओपाँर यहूदीराए यापासल ज़ नैक्यो। ३ नोर नो याकाए ओसतत यामालिदी ब, यायुँ ओमाहुप्दी ब परमेस्वरलाई असतलाव माजैधुर। ४ मानुवाताव मिं भरी ओपोःस ज़ असतलावर याथंरिदी ब, परमेस्वर ते सतलाव ज़ थंरिन्या ले। धर्मसास्त्रल मनी परमेस्वरए उजूनी इताव सर्सिउ लिज़्या,

“नपाँ भरिल नँ ज़ साचो

थंरिन्या नले।

नपाँलाई याफाल्दी ब

नँ ज़ भेंःन्या नले।”

५ रूवा रूवाराए ते मिंराए बिचार मितावनी है लिज़्याखेरहो, “माचाव गेयेननी परमेस्वरए ओयेन भन ज़ ओसत ल्यो औरैःकिन कातानी गेलाई नो येनत सजा ओयासिरिज़्याव?”

६निताव ते माताए। परमेस्वरए ननी
 ज्ञ अन्याय ओदोव उथ०रिकिन,
 कै जैद आव मानुवाताव मिँरालाई
 याफालोके? ७रूवा रूवाराए फरी,
 “काता, गे माचाव गेयेनत परमेस्वरए
 उमिन भन ज्ञ ओघ्योःकिन काराव
 गेलाई पापी ओथ०रैसिज्याव? ८हिताव
 ताकिन चाव घताक लिद प्राईए पाप
 ज्ञ गेदोया,” है लिज्याखेरहो। हिताव ते
 माताए। गेमिन बले०दचाव पैज्याव रूवा
 रूवाराए ते भन हो ज्ञ थ०रैदचासिज्यार।
 नितावराए सजा दैन्या ते थिक ज्ञ।

परमेस्वरए ओड़ाक सु ज्ञ धर्मी माथ०रिए

९है जैद गे यहूदीर छुत जातलाव
 मिँराकिन चावर गेमाले। डा है
 डादाचिज्याव मिताव यहूदीर तादी ब,
 छुत जातलावर तादी ब प्राई पापल ज्ञ
 लिज्यार। १० धर्मसास्त्रल मनी इताव
 सर्सिउ लिज्या,

“परमेस्वरए ओड़ाक धर्मी
 तोबो ब माले।

११ परमेस्वरए ओपाँ तीज्याव ब
 सु ज्ञ माले।

परमेस्वरलाई खिम्ज्याव ब
 सु ज्ञ माले।

१२ प्राई तँदा बाद

काम मालागिउर ताद लेर।

चाव येन दाज्यावर
 तोबो ब मालेर।”

१३ “नोराए याभोकोरा घवाँःव खादर
 स्यासो लिज्या।

यापाँ ब धुत वाज्ज लिज्या।”

“यायाःत घुलए ओधास स्यासो
 लिज्या।”

१४ “यायाःनी हुज्याव भरी गाल सोनो
 सराप वाज्ज लिज्या।”

१५ “मिँ सैःन्यादा याखँ
 बनै गिल्ज्या।

१६ जोड बाद ब दुख यान्या वाज्ज
 सैज्यार।

१७ छुतस खैन्या येमदा
 खर्क ज्ञ माबार।”

१८ “परमेस्वरलाई रँःद ब माछे०र।”

१९ जे जेसैज्या, जो कानुन तादी ब
 कानुन मादैवराए जूनी ते माले, दैवराए
 जूनी ज्ञ लिज्या। है जैद मानुवाताव मिँ
 भरी परमेस्वरए ओड़ाक पाँन्या येम ज्ञ
 माले, ओपो०स ज्ञ परमेस्वरए ओसजा
 दैन्यार ताद लेर। २० कानुनलाव येन
 दाद परमेस्वरए ओड़ाक सु ज्ञ धर्मी
 थ०रिन्या मालेर। नो कानुनए ओयेन ते
 गोपाप सतैदचान्या लिज्या।

परमेस्वरए ओड़ाक खत माल्यो
थ०रिन्या

२१गे मिँरालाई परमेस्वरए ओड़ाक
गेखत माल्यो धर्मी थ०रिन्या साःरो येम
सतैसिउ लिज्या। हो येम कानुनलाव
येन दान्यानी माःक। हैदी ब नो येम
डादाकिन ज़ मोसाए ओकानुन सोनो
अगमबक्तराए यासरो भरिल सतैसिउ
लिज्या। २२नो येम आव ज़ — जोए
येसु ख्रीसलाई उयुँ हुज्या, नो उयुँ
उसुहुबोनी ज़ परमेस्वरए ओड़ाक धर्मी
थ०रिज्या। है जैद यहूदीरालाई तादी
ब, छुत जातलावरालाई तादी ब, हुनी
वाज़ लिज्या। २३काराव ल्यो ताकिन
प्राइँए ज़ पाप दाद परमेस्वरए ओज़गैनी
अछत ताकेर। २४है जैद परमेस्वरए
उयुँ गराँद मिँरालाई ओज़ा येसु ख्रीसनी
ओलस सखैन्याए जूँनी यासजानी
अइज़ यापलेक्यो। २५ओज़ाए
ओक्याँत यायुँ हुज्यावरालाई
ओल परमेस्वरए ज़ यासजा भरी
नोए उभीनी ज़ क्याल्द याएज्याव।
परमेस्वरए ओन्याय सतैन्याए जूँनी
येसु ख्रीस ओमाहुदकाव यादोव पाप
भरी सहिदचाद ओज़ाए ओक्याँत ज़
सयोद याएक्यो। २६आज्याल मनी
ओज़ा येसुलाई यायुँ हुज्यावरालाई

हुनी ज़ यासखैज्याव। परमेस्वरए
न्यायस ज़ ओराफाल्ज्याव मनी ननी ज़
रैःज्या।

२७है जैद मिँराए, ‘डा डादोव
येननी ज़ परमेस्वरए ओड़ाक धर्मी
डाथ०रिके’ है लिद मास०धुर, युँ
हुप्यानी वाज़ धर्मी तान्या ताज्या।
२८कानुनलाव येननी परमेस्वरए
ओड़ाक सु ज़ माथ०रिधुर, युँ हुप्यानी
वाज़ परमेस्वरए ओड़ाक कानुन
सयोसिउ थ०रिज्या। २९परमेस्वर
काता यहूदीराए यापरमेस्वर वाज़ रो?
छुत जातलावराए यापरमेस्वर माःक
रो? नो छुत जातलावराए यापरमेस्वर
पाला ज़ सानी। ३०परमेस्वर तोबोका
तोबो वाज़ ओतावए, नो परमेस्वर
यहूदीराए यापरमेस्वर वाज़ माःक,
प्राइँए यापरमेस्वर ज़ लिज्या। है जैद
यहूदीर तादी ब, छुत जातलावर
तादी ब परमेस्वरए मिँरालाई उयुँलाव
मिताव धर्मी ओरारैःज्याव तोबोनी
वाज़ — नो येसुलाई युँ हुप्यानी वाज़
लिज्या। ३१है जैद परमेस्वरए ओड़ाक
धर्मी थ०रिन्या येम युँ सुहुप्यानी वाज़
ओताकिन ‘कानुन ते अनाकलाव ची
ओल्यो’ है जेलिज्याखेहो। हिताव ते
माःक, बुरू गेयुँ गेसुहुबोनी परमेस्वरए
ओकानुन भन ज़ गेसयोःज्या।

अब्राहामए उयुँ उसुहुबोनी ज़ धर्मी
थ०रिके

४ हो ताकिन यहूदीराए गेपुर्खा
अब्राहामए उजूँनी काता
पाँन्या? २ अब्राहामए ओदोव येननी
परमेस्वरए उयुँलाव मिताव उथ०रिउ
ताकिन, ‘डानी ज़ धर्मी डाथ०रिके’ है
लिखेहो। खाली परमेस्वरए ओड़ाक
ते है मालिधुइ। ३ धर्मसास्त्रल ब नोए
उजूँनी इताव सर्सिउ लिज़्या,

“अब्राहामए परमेस्वरए ओपाँत
उयुँ उसुहुबोनी ज़
परमेस्वरए नोलाई
धर्मी ज़ थ०रैक्यो।”

४ येन दाज़्यावए ओजेला ते दयानी
मादैव, ओयेनए ओपाकैवनी वाज़
दैज़्याव। ५ ओयेननी काता ज़ मापाकैव
मिँए ते यागलती क्याल्दचाज़्याव
परमेस्वरलाई उयुँ उसुहुक्किन, नो
ज़ भन परमेस्वरए ओड़ाक धर्मी
थ०रिज़्या। ६ दाऊदए पाला परमेस्वरए
यायेन चिऊद मायाद धर्मी ओराथ०रैव
असिकए जूँनी अइ लिद सर्द नैव,

७ “मादान्या यादोव येनलाई चिऊद
मायाद,
यापाप क्याल्द ओराएकिन,
नोर याभागी ल्योर लिज़्यार।

८ परमेस्वरए यापाप ओलेखा नैद
ओमाराएकिन,
नोर ब असिक दैवर लिज़्यार।”

९-१० नो परमेस्वरए ओराएज़्याव
असिक क्याल्न्या सरेस जैसिउरालाई
वाज़ माःक, प्राईँलाई ज़ यासिउ
लिज़्या। परमेस्वरए अब्राहामलाई
पाला क्याल्न्या सरेस ओमाजैसिद
ड़ादा ज़, उयुँ उसुहुबोनी वाज़ धर्मी
थ०रैक्यो। ११ उयुँ सुहुप्द परमेस्वरए
ओड़ाक धर्मी उथ०रिउ छींनी वाज़
परमेस्वरए, ‘डामीं ज़’ लिद थामिन्याए
जूँनी नो सरेस याकाए जूँनी एक्यो।
है जैद अब्राहाम क्याल्न्या सरेस
माजैसिउ यायुँ हुप्ज़्याव छुत जातलाव
मिँराए याबाबु मनी ज़। नोर मनी यायुँ
यासुहुबोनी ज़ परमेस्वरए उयुँलाव
मिताव उमींर ताज़्यार। १२ फरी
क्याल्न्या सरेस जैसिउ यहूदीराए
याबाबु मनी लिज़्या, खाली नोर मनी
यापुर्खा अब्राहामए उसिलत बाद नोए
ओदोव मितावनी ज़ यायुँ यासुहुक्किन
वाज़ साचो नोए ओथोर ताज़्यार।

अब्राहामए उयुँ उसुहुबोनी ज़
परमेस्वरए ओयाका दैक्यो

१३ परमेस्वरए अब्राहाम सोनो
ओथोरालाई, ‘आव मानुवाताव

राज्या जेमीं ज़ जैद डाय़ाचिरिज़्या' है ओरादोव याका अब्राहामए कानुन-लाव येन ओदोवनी ओदैव माःक, उयुं हुपद परमेस्वरए उयुंलाव मिताव उथरिउनी ओदैव ची। १४ परमेस्वरए नोरास ओनैधुव याका, छीनी कानुन-लाव येननी दैन्या ओजैव ताकिन, युं हुपुन्या भरी अनाकलाव ज़ ताद परमेस्वरए ओय़ाका ब मातान्या ज़ ताखेहो, १५ काराव ल्यो ताकिन कानुननी ज़ मिंराए परमेस्वरनी सजा दैज़्यार। कानुन ओमालिकिन सजा ब माताखेहो।

१६ है जैद ज़ परमेस्वरए 'नो याका डायुं गरावनी ज़ ओताक' लिद अब्राहामए ओथोरालाई नो याका दैन्या यायुं यासुहुबोनी ज़ जैद याएक्यो। ननी वाज़ नोरालाई दैन्या फिस्को माताए। नो याका कानुन धूँलाव यहूदीराए जूँनी वाज़ माःक, प्राइँए गेबाबु अब्राहामए ओदोव मितावनी ज़ यायुं सुहुपुज़्याव भरिराए जूँनी ब लिज़्या १७ धर्मसास्त्रलाव सर्सिउ मितावनी ज़, "परमेस्वरए अब्राहामलाई प्राइँ राज्यालावराए याबाबु ज़ जैद नैद यायो।" नो याका उयुं उसुहुपुज़्याव परमेस्वरए ओड़क थरिउ ज़

ताके। नो परमेस्वर सिउरालाई ब याजागैज़्याव, ताज़्याव भरी ब ओपाँनी ज़ यासिर्जेज़्याव। १८ आस मालिज़्यावत ब अब्राहामलाई, "नथोर मागनिसिधुन्या तारिज़्यार," है ओदोव पाँत उयुं हुपुके। है जैद अब्राहाम कुधु जातलावराए याबाबु ताके। १९ ज़ार मादैद सय बर्सवा ताद फ्या-न्याल गनिसिद उलिज़्यावत ब, ओज्या सारा जूचास्द ओबेथ रूःमद उलिज़्यावत ब उयुं मासतेद परमेस्वरए ओपाँत उयुं हुपुके। २० है जैद परमेस्वरनिकाव ओदैव याकात अब्राहामए उयुं आदा होदा माजैद, उयुंर भन ज़ हुपुद, परमेस्वरलाई ओमानर नैदचाद, २१ 'डालाई है ओदाँव भरी जुनी ब सयो-दचाँवा ज़' लिन्या सैक्यो। २२ ननी ज़ परमेस्वरए अब्राहामलाई धर्मी थरैक्यो।

२३ खाली नोलाई धर्मी ओथरैव पाँ ओललाई वाज़ माःक, २४ गे गेजूनी ब लिज़्या। गे ब गेप्रभु येसुलाई सिउनी सोचोइज़्याव परमेस्वरलाई गेयुं गेसुहुपुकिन नोए गेलाई मनी धर्मी ज़ थरैन्या ले। २५ परमेस्वरए गे गेपापए जूनी येसुलाई ज़ सिउ एक्यो। फरी परमेस्वरए ओड़क गे धर्मी

४:१३ उत १७:४-६; २२:१७-१८ ४:१७ उत १७:५ ४:१८ उत १५:५

४:१९ उत १७:१७

थ०रिन्याए जूनी येसुलाई सिउनी सोचोइक्यो।

परमेस्वरस खैव भरिए असिक दैज्यार

५ है जैद गेयुं गेसुहुबोनी परमेस्वरए ओड़ाक गेगलती माल्यो धर्मी गेथ०रिउए, गेप्रभु येसु ख्रीसनी परमेस्वरस गेखैज्या। २गेयुं गेसुहुबोनी ज़ नो गेप्रभुए गेल्योदा उयुं गरॉद ओबाबु परमेस्वरस साःरो सज्यो जैद ओयासिउए गे नत ज़ गेलिज्या। ननी ज़ गे स्वर्गताव आसत गेयुं हुपद रेंव ज़ गेलिज्या। ३नाः वाज़ माःक, जो मिताव दुख उहुदी ब गेयुं गेमासतेए, काराव ल्यो ताकिन नो दुखराए गेलाई माबलेःसिउ, भन थ०रिउ ज़ जैसिज्याव। ४थ०रिउ युंए फरी, पाखो जैव दोज्याव। पाखो ताव मिंए ओआस भन घ्योःनाज्या। ५गे आव आसत निरास तान्या गेमाले, काराव ल्यो ताकिन परमेस्वरए छैव उपुरूस याद नो छैव पुरूसनी गेयुंल ओमया थुद नैदद्यासिउ।

६गेनी काता ज़ माजैधुन्यार गेलिज्याक, थिक ओगोइँव बेलाक ज़ ख्रीसए गे पापीराए जूनी उजिउ भाःदद्यासिक्यो। ७मिंराए ताकिन ते

चाव मिंए उजूनी ब सुए ज़ उजिउ भाःद मायो, खाली बनै घ्योःव उयुं उलिकिन वाज़ कैताराक बनै चाव मिंए उजूनी उजिउ भाःदद्याव ब धुव। ८खाली परमेस्वरए ते गेल्योदा उयुं उलिज्याव आनी ज़ रेंःज्या — गे पापीर गेलिज्याक ज़ ख्रीसए गेजूनी उजिउ भाःदद्यासिक्यो। ९है जैद नो उभीनी ज़ परमेस्वरए ओड़ाक उयुंलाव मिताव ओजैसिउए, नोए ओल्योनी ज़ परमेस्वरए ओसजानी ब पुलुस्न्या गेले। १०गे निताव ओलकिन तँदा लिज्यावराए गेजूनी उजिउ भाःदद्याद ओबाबु परमेस्वरस ओसखैसिउए, गे परमेस्वरस खैवराए गेजूनी ते दाद ओमायासिज्याव काता ची लिज्यादा? काता ज़ माले। ओल सिउनी सोद परमेस्वरस उलिज्यावए गेलाई मनी बाँचैसिज्याव। ११हो वाज़ माःक, गेप्रभु येसु ख्रीसनी परमेस्वरस गेखैवए, परमेस्वरए ओड़ाक गेयुंर होलाँ ताद रेंव ज़ गेलिज्या।

आदम सोनो ख्रीसनी

१२आव मानुवात तोबो मिंए ल्योनी ज़ पाप पसिके। ननी ज़ सिन्या ब ताके। हाःकिन प्राइँए पाप यादोवए प्राइँ सिन्या ताकेर। १३मोसाए

ओकानुनकिन झादा ज़ आव मानुवात पाप पसिद उलिज़्याव। खाली नो कानुन ओमातावा पै नो यादोव पापए ओहिसाप ब ओमालिज़्याव। १४हितावत ब आदमए ओपालाकिन मोसाए ओपालाक पै सिउ ज़ यालिज़्याव। नोराए आदमए ओदोव पाप मिताव यामादोदी ब सिउ ज़ परिके। है जैद किताव आदमए ओदोव हुनानी प्राइँलाई ताके, हिताव ज़ छीनी हुज़्याव ख्रीसए उहुनानी मनी प्राइँलाई ज़ ताके।

१५खाली आदमए ओदोव पाप परमेस्वरए ओदया स्यासो ते माले। आदमए ओदोव पापनी कुधुए सिन्या सजा दैकेर। येसु ख्रीसए ओदोव हुनानी परमेस्वरए ओदया ताद प्राइँए बाँचिन्या असिक दैकेर। १६हो मिताव ज़ परमेस्वरए ओल्योनी गेदैज़्याव असिक आदमए उहुनानी गेदैज़्याव स्यासो माःक। आदमए उहुनानी परमेस्वरए ओसजाल प्राइँ ज़ परिके। ख्रीसए उहुनानी ते नोराए कुधु पाप यादोव तादी ब परमेस्वरए उयुँ नाद उयुँलाव मितावर थ०रिज़्यार। १७तोबोए ओदोव पापए हुनानी प्राइँ सिन्याल परिके। परमेस्वरए ओदयानिकाव असिक दैद ओड़ाक धर्मी थ०रिउराए ते होकिन भन येसु ख्रीसए उहुनानी अजम्बरी जुनी दैज़्यार।

१८है जैद तोबो पापनी प्राइँ ज़ परमेस्वरए ओसजा दैन्या ताकेर। हो मिताव ज़ तोबो धर्मलाव येननी प्राइँए ज़ फुर्सुल ताद साःरो जुनी दैन्या ताकेर। १९काराव ल्यो ताकिन किताव परमेस्वरए ओपाँ तोबोए ओमाभैःवनी कुधु ज़ याखत ल्योर थ०रिके, हिताव ज़ परमेस्वरए ओपाँ तोबोए ओभैःवनी कुधु ज़ याखत माल्यो छेंवर थ०रिके।

२०मिँ भरी प्राइँ पापीर ज़ लिज़्यार लिन्या सतैदचान्याए जूनी परमेस्वरए कानुन जैक्यो। हितावत ब नो पाप खा कुधु ओताव, नोकिन भन परमेस्वरए ओदया कुधु ज़ ताके। २१किताव झादा प्राइँ मिँ पाप धूँल ताद सिन्या सजाल परिके, हिताव ज़ परमेस्वरए ओदयानी नो भरी तोसिद, गेप्रभु येसु ख्रीसनी परमेस्वरस सखैसिद, अजम्बरी जुनी दैन्यार गेताज़्या।

पापलाई रास्द ख्रीसनी साःरोल पुलुस्य्या

६ जे ख्वाराए ते, ‘परमेस्वरए ओदया भन कुधु घताक लिद गे मनी भन पाप गेदोया की’ है जेलिज़्याखेहो। २हिताव ते माःक। गे पापस सज्यो फ्याःद पापए जूनी सिधुवर काराव फरी पापल जन्त्या? ३जे जेसैज़्या, गे येसु ख्रीसए उमिनत

गेसछैसिक ओलस तोबो ताद, सिप ज़ गेसिके। ४ है जैद किताव ख्रीसए सिउ ओक्याँलाई खादरल याभाःव, हिताव ज़ गे मनी ख्रीसए उमिनत गेसछैसिक डादाडाव गेक्याँ खादरल बाके। खाली हो वाज़ माःक, किताव ओबाबु परमेस्वरए ओसक्तीनी सिउनी ओसोव, हिताव ज़ गे मनी सोद साःरो येमल गेबाज़्या।

५ सिन्यात ओलस तोबो गेताकिन, साःरोल पुलुस्न्यात मनी ओलस तोबो ज़ गेताज़्या। ६ आव ब सैंच्यो, नो डादाडाव पाप दोज़्याव गेक्याँ ख्रीसस क्रुसत सिप ज़ सिके, हाःकिन पाप धूँल गेमाले। ७ काराव ल्यो ताकिन सिउ मिँ पापए उधूँल मालिद फुर्सुल ताज़्या। ८ गे ख्रीसस सिप गेसिउए, 'ओलस साःरो जुनील पुलुसोर ब गेताके' लिद गेयुँ हुपद ले। ९ ख्रीस सिउनी ओसैसिउत फरी खर्क ज़ सिन्या माले। होए ओक्याँत सिन्याए ओहक फरी तान्या माले। १० नो तखेप उसिउ गेपापए उज्जूनी ज़, नो सिउनी पुलुसो उजिउ ते परमेस्वरए उज्जूनी ज़ बाँचिज़्या। ११ हिताव ज़ जे मनी 'गे पाप दान्यात सिद, येसु ख्रीसनी जींदो ताद, आव गेजिउ परमेस्वरए उज्जूनी बाँचिज़्या' लिन्या चेतैव ताके।

१२ है जैद जे आव जेजिउत कुबाना बानी धूँल लिद जेमन लागिउ येनदा

ताबाच्यो। १३ पाप दान्यादा जेखँ जेकुइलाई फरी बाव ताएच्यो। बुरू, 'गेलाई सिउनी बाँचैज़्याव नँ ज़' लिद जेक्याँ भरी परमेस्वरलाई चरैःद, उयुँलाव मिताव येन दान्यादा जेक्याँर थाँच्यो। १४ जे कानुन धूँल माताद परमेस्वरए ओअसिक धूँल जेतावए, जे जेक्याँत पापए ओहक माताव परिके।

ख्रीसए ओसेवा दान्यार ताद जेले

१५ जे ख्वाराए ते, 'कानुन धूँल माताद असिक धूँल गेलिज़्यावए पाप गेदोदी ब ओताज़्याव ची ओल्यो' है जेलिज़्याखेहो। हिताव ते माःक। १६ काता जे, जोए ओपाँ भैःद ओसेवा जेदोज़्या, होए ओनोकोरर जेताज़्याव जेमासैए रो? मादान्या येन दाद होत ज़ जेलिकिन सिन्या सजाल परिन्या जेले। फरी परमेस्वरए ओपाँ जेभैःकिन ते ओडाक उयुँलाव मितावर थंरिन्या जेले। १७ जे डादा मादान्या येनर दाद पापए ओबाँदार जेल्यो। अब ते परमेस्वरए ओपाँ किताव जेथैव, हिताव ज़ नो पाँत लिद जेयुँ स्यानी ज़ जेदोज़्या। आवए उज्जूनी परमेस्वरलाई धन्याबाद लिज़्या। १८ जे पापए ओसेवानी पुलुस्द चाव येन दान्यादा परमेस्वरए ओसेवा दान्यार ताद जेले। १९ आव डापाँ कसा मातीधुर लिद

जेतीधुन्या पाँनी ज़ डापाँज्या। किताव
 डादाकिन जेखँ जेकुइए युँ माजामो
 माचाव येन दावका दाव लिद होए
 ओबाँदा जेजैसिज़्याव, हिताव ज़
 अबकिन ते नो जेखँ जेकुइलाई
 परमेस्वरए ओयेन दाव परींद होए
 ओसेवा दान्या जेजैसिकिन उमिनताव
 छैँवर जेतारिज़्या। २० जे डादा मादान्या
 येन दाद पापए ओबाँदा जेजैसिक,
 परमेस्वरए ओयेन दान्या जात्त ज़
 जेमाचेतैज़्याव। २१ है जैद आज्याल ते
 नो डादाडाव जेदोव येनलाई जेचेतैक
 जेलाज ब हुज़्या। नो डादाडाव जेदोव
 भरिए जेलाई यादा माजैचिक्यो, भन
 सिन्याल वाज़ ओभाःचिज़्याव।
 २२ अब ते जे नो पापए ओसेवा
 दान्यानी पुलुस्द परमेस्वरए ओसेवा
 दान्यार ताद जेले। ननी ओफाइदा नेथो
 लिज़्या — परमेस्वरए उयुँलाव मिताव
 छैँवर जेतानाज़्या, सोनो अजम्बरी
 जुनी ब जेदैरिज़्या। २३ पापए ओजेला
 नर्ग लिज़्या, परमेस्वरए ओयासिज़्याव
 बरदान ते गेप्रभु येसु ख्रीसनी अजम्बरी
 जुनी लिज़्या।

ख्रीससकाव साःरो सज्यो

७ अ डानैँ डामेर, जे मोसाए
 ओकानुन भरी सैँद जेने। है
 जैद आव डापाँ ब चावस तीच्यो। जो
 मिताव कानुननी तादी ब नो कानुनए

ओहक मासिवा भरी वाज़ लिज़्या।
 २ किताव रे दाव मेंमा, ओरे ओमासिवा
 पै कानुन मितावनी ओरेए ओसतत
 लिन्या ज़ लिज़्या। ओरे उसिकिन
 वाज़ बल्ल फुर्सुल ताज़्या। ३ ओरे
 लिज़्यावत ज़ नो मेंमा छुतए ल्योदा
 ओरेस्किन नो मेंमाए जारी येन ओदोव
 थंरिज़्या। खाली ओरे उसिकिन वाज़
 नो कानुननी फुर्सुल ताज़्या। हाःकिन
 छुतस ओरेस्दी ब नोलाई काता खत
 ज़ माले।

४ डानैँ डामेर, हो मिताव ज़ गे मनी
 डादाकिन मोसाए ओकानुन धूँल
 गेलिज़्याव। खाली ख्रीसए उमिनत
 ओलस गेसिउ मिताव ज़ ओतावए नो
 डादाकिनकाव मोसाए ओकानुनलाव
 गेसज्यो भरी फ्याःद अबकिन ते
 सिउनी सोव ख्रीसस साःरो गेसज्यो
 ताके। हुनी ज़ परमेस्वरए उयुँलाव
 मिताव येन ब सयोःधुन्या गेले। ५ डादा
 माचाव गेयेनए उधूँल गेलिज़्याक
 कानुनलाव 'मादान्या' सर्सिउए गेलाई
 भन मादान्या वाज़ खर० चेतैव
 उपरींसिज़्याव। है जैद सिन्या सजाल
 गेपरिके। ६ आज्याल ते नो सजात
 गेसिउ मिताव ज़ ओतावए नो कानुनए
 ओहकनी पुलुस्द गेले। है जैद हाःकिन
 गे परमेस्वरए ओसेवा कानुननी
 गेदोज्याव माःक, गेयुँल लिज़्याव छैँव
 पुरूसनी ज़ गेदोज्याव ची।

कानुनए ओयेन पापलाई सरैःदचान्या

७डा परमेस्वरए ओकानुन माचाव है डालिङ्याव ते माःक। कानुन ओमाल्यो ताकिन 'पाप आव ज़' लिद कातानी ड़ासैरिङ्याव? कानुनल "लोभ दान्या माताए" लिद सर्सिउ ओमाल्यो ताकिन डा लोभए उमिन ब डामासैखेहो। ८खाली नो कानुनलाव 'तादोच्यो' लिन्या पाँत ज़ पापए ओमौका हुके। ननी ज़ डायुँलाव प्राडँ किसिमलाव लोभ ब सरैःदचाँक्यो। है जैद कानुनल 'तादोच्यो' लिन्या ओमाल्यो ताकिन डापाप ब मारैःखेहो। ९डा ड़ादा परमेस्वरए ओकानुन डामासैद, सन्चस ज़ डालिङ्याव। हाःत ज़ ओकानुनलाव पाँर ड़ासैवत डापाप भरी रैःद सिउल डागनिसिके। १०है जैद नो कानुनलाव बाँचैव परिन्या पाँए ज़ भन डालाई सिन्याल भाःनाङ्याव लिन्या ड़ासैके। ११खास नो ड़ादाकिनकाव डादोव पापए ज़ कानुननी पल्लैन्या कर दैद डालाई भुकैद नो कानुननी ओसैःनाव मिताव ताके। १२हैदी ब परमेस्वरए ओकानुन माचाव माःक, छैँव ज़ लिङ्या। नलाव दान्या येन ब परमेस्वर मिताव छैँव ब लिङ्या, सोजो ब

लिङ्या, चाव ब लिङ्या। १३है जैद डालाई सिन्या सजाल नो चाव पाँए ओभाःनाव ते माःक, डादोव येनए ज़ ओभाःनाव ची। है जैद डादोव येनए परमेस्वरए नाः चाव ओकानुननी मनी सिन्याल ओभाःनावए, नो ड़ायेन 'पाप ज़' रैःके। है जैद परमेस्वरए ओकानुननी पाप भरी भन छे छे ड़म्सिउ रैःङ्या।

मिर्राए युँ सोनो क्याँ

१४नो कानुन भरी परमेस्वरनी हुव, चाव ज़ लिङ्या लिन्या ते गेसैँङ्या। खाली डा माचाव येन दोङ्याव सोनो पापए ओबाँदा डालिङ्याव ज़ रैःङ्या। १५निताव ड़ायेनलाई रैःद डा मनी बक्क ज़ डाताङ्या। ड़ायुँए चाव येन दाव ड़ापैदी ब, नो येन मादाद भन ड़ासोव येनलाई ड़ादोङ्याव ओल्यो। १६नो ड़ासोङ्याव माचाव येननी ज़ 'परमेस्वरए ओकानुन ते चाव ज़ ओल्यो' लिन्या ड़ाथःरैङ्या। १७नो डादोव येन ड़ानी ज़ ड़ाखुसीनी डादोव माःक, ड़ायुँलाव पापए ची ओदोङ्याव ओल्यो। १८आव ड़ाक्याँत चाव काता ज़ माले लिन्या ड़ासैँङ्या। ड़ायुँल चाव येन दाव ड़ापैदी ब, ड़ाकुइए ते ड़ामासयोःधुइ। १९'चाव

येन डादोया' है डालिदी ब, नो येन ज़ मापुलुसे। भन वैव डापैँज्याव येन, हो ज़ पुलुस्ज्या। २० डायुँए ओमाभैँःव येन डादोँज्या ल्यो ताकिन, नो डानी डादोँज्याव माःक, डायुँलाव पापए ची ओदोँज्याव ओल्यो।

२१ ननी ज़ डासैँज्या — डा चाव येन दाव पैँज्यावए डाक्याँत पाप डास ज़ लिज्या। २२ डायुँल ते परमेस्वरए ओकानुन चाव ज़ डम्मिसद खुसीस डाभैँःज्या। २३ खाली डाखँ कुइए ते डायुँलाव पाँकिन तँदा ज़ दोँज्याव। है जैद पापए ओसक्तीए डायुँस लरैँ दाद, पाप धूँल डालाई कैदी जैद माचाव येनदा ज़ लाँनाज्याव। २४ ओहो! डा इताव पापीलाई सिन्याल भाःज्याव डाक्याँनी सुए हाइनावके? २५ गेप्रभु येसु ख्रीसनी वाज़ पुलुसो डादैँज्या। होए उजूँनी परमेस्वरलाई धन्याबाद लिज्या।

है जैद डायुँए परमेस्वरए ओकानुन-लाव येन दोव डापैँज्या, खाली माचाव येन दाँज्याव डाक्याँए ते पाप दान्यादा वाज़ लाँनाज्याव।

छैँव पुरूसनिकाव साःरो जुनी

है जैद येसु ख्रीसए उमिनत लिज्यावरलाई परमेस्वरनी काता सजा ज़ तान्या माले। २ येसु ख्रीसनी साःरो जुनी याँज्याव छैँव

पुरूसए ओसक्तीनी नो डादाडाव पाप दाद सिन्या सजाल भाःज्याव गेयेननी रास्सिद गेले। ३ गे माचाव येन दोँज्यावराए गेक्याँत परमेस्वरए ओयेन सयोःन्या काता सक्ती ज़ ओमाल्योए नो कानुनए सुलाई ज़ धर्मी माजैँधुव। है जैद परमेस्वरए ओल ओज़ालाई गे स्यासो मिँ जैद, गेपापए उजूँनी परीँद, गेक्याँताव पापए ओसक्ती भरी समैदचासिक्यो। ४ परमेस्वरए ओकानुनलाव पाँ भरी गे माचाव येन मादाद छैँव पुरूसनी दाँज्यावराए गेक्याँनी ज़ ओयोःक लिद ननी ज़ दादचासिक्यो।

५ क्याँनिकाव माचाव येन दोँज्यावर ते याक्याँए ओपैँज्यावदा वाज़ यायुँ भाःज्यार। छैँव पुरूसनी दोँज्यावर ते छैँव पुरूसए ओपैँज्यावदा ज़ यायुँ भाःज्यार। ६ माचाव येन दोँज्याव क्याँए ल्योदा यायुँ भाःज्यावर पापल सिज्यार। छैँव पुरूसए ओल्योदा यायुँ भाःज्यावर ते यायुँ होलाँ ताद साःरो जुनी दैँज्यार। ७ नो क्याँए ल्योदा भाःसिउ युँ ते परमेस्वरकिन तँदा ताद परमेस्वरलाई सोँज्याव। परमेस्वरए ओकानुन धूँल मालिधुइ। ८ है जैद क्याँए ओपैँज्याव माचाव येननी सुए ज़ परमेस्वरलाई खुसी माजैँधुव।

६ खाली जेस ते परमेस्वरए उपुरूस जेयुँल बास ओदोवए माचाव येन

दोऽयाव क्याँए उधूँल माताद परमेस्वरए उपरूसए उधूँल जेलिऽया। जोस ख्रीसए उपरूस माले, हो ख्रीससकाव माःक। १० है जैद जेक्याँत ख्रीस उलिकिन, पाखाताव जेक्याँ पापए उहुनाए उसिदी ब, परमेस्वरस जेखैवए परमेस्वरए उपरूसनी साःरो जुनी जेदैऽया। ११ येसुलाई सिउनी सोचोइऽयावए उपरूस जेयुँल बास ओदोवए, येसु ख्रीसलाई सिउनी सोचोइऽयाव ओबाबुए जेलाई मनी तछा ओल उपरूसनी ज़ जेक्याँलाई अजम्बरी जुनील सोचोइचिरिऽयाव।

१२ है जैद डानें डामें, गेक्याँए मादान्या उखिम्ऽयाव मितावनी दान्या गेलाई काता कर ज़ माले। १३ क्याँए उखिम्ऽयाव मितावनी माचाव येनल ज़ जेलिकिन सिन्या जेले। छैव परूसए ओसक्तीनी ते निताव क्याँनिकाव माचाव येनरालाई जेरासमैकिन साःरो जुनी ज़ दैन्या जेले। १४ परमेस्वरए उपरूसए ओरापैऽयाव मितावनी दोऽयावर ज़ परमेस्वरए ओज़ार ताऽयार। १५ परमेस्वरनिकाव जेदैव परूसए जेलाई छेःद ज़ लिन्या उधूँलाव बाँदा स्यासो माजैचिउ, बुरू ओल परमेस्वरस ज़ा बाबु ज़ तान्या जैचिऽयाव। ननी ज़ गे परमेस्वरलाई

‘अब्बा, बाबु’ है ब गेदोऽया। १६ छैव परूस गे गेपूरूस जोरैसिद ‘परमेस्वरए ओज़ार गेताके’ है लिन्या पाँत ओल ओसाची ब याद नो गेयुँलाव पाँलाई जोदर्यासिऽयाव। १७ गे ओज़ार गेतावए ओबताहा दैन्यार ब गेताके — ओज़ा ख्रीसस सिप ज़ दैन्या गेले। है जैद ओल उमिनताव दुखर गेदैकिन ओलस ज़ सुख ब दैन्या गेले।

आज्यालकाव दुख जाँवा पै वाज़

१८ आव गेजिउताव गेदैऽयाव दुखर अजम्बरी जुनील गेदैरिऽयाव सुखकिन काता ज़ माले लिद डायुँ हुपद ले। १९ परमेस्वरए ओरासिजैव भरिए ब ‘परमेस्वरए ओज़ारालाई खर्क सतैद अजम्बरी जुनी यायोके?’ लिद यायुँ थू जैव ज़ नैऽयार। २० नो ओरासिजैव भरी ते खेमन्यादा मान्यादा बान्या ताकेर। नो यानी माःक, ओल परमेस्वरए ज़ नै याजैक्यो। खाली नोरालाई मनी तोबो आस लिऽया — २१ परमेस्वरए ओज़ारालाई फुर्सुल जैद ओज़गै मगै ओराएरिऽयाव मिताव ज़ नो ओरासिजैव भरी तछा खेमन्या मान्यानी बाँचिद साःरोल पुलुस्न्या लेर। २२ किताव ज़ा दैन्या मेंमा उघर्लिऽयाव, हिताव ज़ नो ओरासिजैव

भरिए नो भरी ओमातावा पै 'आव जुकलाव दुखर खर्क खेम्के?' लिद उथुपुल ताद गहनिउ ज़ लिज़्यार। २३खाली नोर वाज़ माःक, गे उपुरुस बैना दैवराए मनी 'आव सिन्यानी खर्क पुलुस्द ओज़ार गेमिन्सिके?' लिद गेयुँ थू जैद कींव ज़ गेनेज़्या। २४निताव आसए जूनी ज़ परमेस्वरए ओपाँत गेहुके। हुन्या पाँत वाज़ आस ताज़्या, ताधुवलाई आस गेमादोदी ब ताए। २५खाली गेआस आःपै माहुताव पाँत ओतावए, नो पाँ ओमाहुवा पै गेयुँ थू जैद कींव ज़ गेनेज़्या।

छैव पुरुसए सघैसिज़्याव

२६हिताव ज़ गेनी गेमादोधुज़्याव येनल छैव पुरुसए गेलाई सघैसिज़्याव। परमेस्वरलाई पोंखारिन्या मनी गेनी ज़ गेमासैए। ओल छैव पुरुसए ज़ गे सुए ज़ गेमाहाइधुज़्याव पाँर गेयुँल पाँदद्यासिज़्याव। २७प्राइँ युँलाव पाँ सैज़्याव परमेस्वरए नो छैव पुरुसए गेयुँलाव ओपाँव पाँए ओअर्थ भरी तीज़्याव। काराव ल्यो ताकिन गे परमेस्वरए उमिनत लिज़्यावराए गेजूनी नो पुरुसए पाँद ओयासिज़्याव पाँ भरी ओल परमेस्वरए उयुँलाव पाँस खैव लिज़्या।

२८आव पाँत गेयुँ हुण्ड्या — परमेस्वरए उमिनताव खुल्सिउर,

ओल्योदा यायुँ थू जैद नैज़्यावरालाई ओल परमेस्वरए ज़ प्राइँ यालाई तान्या ज़ सखैद याएज़्याव। २९परमेस्वरए ड़ादाकिन ज़ 'डामीर ज़ तारिज़्यार' लिद सरेस्द ओरानैज़्यावरालाई, नोराए याक्याँत तोबोका तोबो ओज़ाए ओगे रैन्यार याथःरैक्यो। है जैद ओज़ा स्त्रीस छीनी ताज़्याव भरिराए यादाज्यु ताके। ३०नो ड़ादाकिन ओराथःरैवरालाई ओल्योदा हुन्या ब याखुल्क्यो। ओल्योदा हुन्या ओराखुलोरालाई ओलस खैवर ब याजैक्यो। ओलस खैव ओराजैवरालाई याज़गै ल्योर ब याजैक्यो।

परमेस्वरए ओमयानी काताए ब मापलेःसिधुव

३१आव पाँ भरिल गे कै लिन्या लिक ते — परमेस्वर गेल्योदा ओतावए गेलाई सुए ज़ कैज़ माजैसिधुर। ३२तोबोका तोबो ओज़ा ओलस मानैद, सिन्या गेपोल भाःदद्याज़्याव परमेस्वरए, गेलाई ओज़ास ज़ चाहिज़्याव भरी कै जैद मायासिउके? ३३ओल परमेस्वरए ज़ छाँतिद ओराथःरैवरालाई सुए ज़ खत मारालैधुर। परमेस्वरए ओल ज़ उयुँलाव मित्तावर ओराथःरैवए, ३४नोरालाई सजा यान्या सुए ची ओराथःरैधुरिज़्याव? येसु स्त्रीसए

गेपापए जूंनी उजिउ भाःदचासिक्वो।
 हो वाज माःक, सिउनी सोद,
 परमेस्वरए ओवोर्दा चुसिद गेजूनी
 परमेस्वरलाई बिन्ती दाव ज़ नैज़्याव।
 ३५ है जैद गेलाई ख्रीसए ओमयानी
 सुए ओपले·सिधुरिज़्याव? गेलाई
 दुख उहुदी ब, धो सहिन्या उहुदी ब,
 गेखिरी यापसिदी ब, करे गेतादी ब,
 नाङ्ग्या गेतादी ब, नुल उहुदी ब, लरें
 उहुदी ब, गेलाई ओमयानी काताए ब
 मापले·सिधुव। ३६ धर्मसास्त्रल इताव
 सर्सिउ लिज़्या,

“नँ नजूनी गे दिनकाव

सिन्या मितावल गेबाज़्या।

पलना यालाँज़्याव

पाथा स्यासोर गेलिज़्या।”

३७ हैदी ब गेल्योदा उयुँ थू जैज़्यावए
 ल्योनी गे आव भरिल भेंःस्याराकिन
 भेंःस्या ज़ गेलिज़्या। ३८ आव पाँत डायुँ
 हुपद ले — गेसिदी ब, गेबाँचिदी ब,
 स्वर्गताव चाकज्यार तादी ब, मानुवा-
 ताव घेप्पार तादी ब, आज्यालकाव
 पाँरानी तादी ब, हुन्या पाँरानी तादी ब,
 सक्तीरानी तादी ब, ३९ रोतावर तादी
 ब, मेलार तादी ब, छुत कातारानी
 तादी ब, गेलाई गेप्रभु येसु ख्रीसनी
 ताज़्याव परमेस्वरए ओमयानी काताए
 ब मापले·सिधुव।

पावलए उयुँ ओभेरारए जूनी ओघरो

६ डा जेलाई साचो है डादाचिज़्या,
 धुत डामापाँए, ख्रीस साची
 लिज़्या। आव पाँत छैव पुरूसनी
 ब डायुँ छैव ज़ लिज़्या। डापाँ आव
 ज़ — २-३ डाभेरारए जूनी डायुँ बनै
 घरो ज़ लिज़्या। डा नोराए यापोल
 ख्रीसए ल्योनी ख्यासिद ओसराप
 धूँल डापरिदी ब, नोर याबाँचिकिन
 खुसी डाताखेहो। ४ नो इस्राएलीरालाई
 डादाकिन ज़ ओल परमेस्वरए, ओज़ार
 जैन्या थःरैद, ओज़गैर सतैदचाद,
 ओबाचा सोनो ओय्याकार ब याएक्वो।
 ओकानुन ब याद, ओसेवार दान्या
 यापैक्वो। ५ अब्राहाम, इसहाक,
 याकूबर मनी नोराए यापुर्खार ज़।
 नोराए याथोल फरी ख्रीस ब मिँ
 मिन्सिद जर्मिके। नो प्राइँराए डैत
 राज्या दान्या परमेस्वर ज़। नोए उमिन
 एकतार ज़ ओघ्योःक। आमन।

इस्राएलीर प्राइँ परमेस्वरए उमीर मालेर

६ परमेस्वरए नोरालाई ओय्याका
 सयो·द ओमाराएज़्याव ते माःक।
 खाली इस्राएली भरी प्राइँ याकूबए

ओथोर यातादी ब परमेस्वरनी ते प्राइँ मालेर। ७ हो मिताव ज़ अब्राहामए ओज़ार मनी प्राइँ ओथोल ते मागनिसिर। धर्मसास्त्रल मनी परमेस्वरए अब्राहामलाई है दाद नैव,

“इसहाकनिकावर वाज़ नथोल गनिसिन्या लेर।”

८ ननी ज़ रैंऽया, अब्राहामए ओक्याँ बातनिकावर माःक, परमेस्वरए अब्राहामलाई ओयो य़ाकानिकावर वाज़ परमेस्वरए ओज़ार ताज़्यार। ९ नो ओयो य़ाका आव ज़,

“डा फर्नी आः बेलाक फरी डाहुरिज़्या।

हो बेलाक नज्या साराए खेपा ज़ा दैरिज़्याव।”

१० खाली हो वाज़ माःक, गेपुर्खा इसहाकए ओज्या रिबेकाए पाला, जोडोल्या खेपानी निदैक्यो। ११ नोनी चाव ब मादाद माचाव ब मादाद, निआमाए उफूल ज़ परमेस्वरए मिँरालाई ओराथःरैऽयाव मिताव, १२ नियेननी माःक, ओल उयुँ स्यानी ज़ नोनी तोबोलाई रूजिद, रिबेकालाई, “ओदाज्युए ओभाइए ओसेवा दान्या ले,” है दोक्यो। १३ परमेस्वरए

है उलिज़्याव मिताव धर्मसास्त्रल आव मनी सर्सिउ लिज़्या, “याकूबए ल्योदा डायुँ लिज़्या, एसावए ल्योदा डायुँ माले।”[†]

परमेस्वरए उयुँ स्यानी ज़ याछाँतिज़्याव

१४ जे ख्वा ख्वाराए, ‘निताव ताकिन ते परमेस्वरए न्यायस ज़ ओमादोऽयाव ची ओल्यो’ है ब जेलिज़्याखेहो। हिताव ते माःक। १५ परमेस्वरए मोसालाई है दोक्यो,

“जोए ल्योदा डायुँ नान्या डापैऽया, होए ल्योदा डायुँ नाऽया।

जोए ल्योदा डायुँ सयालो डापैऽया, होए ल्योदा डायुँ य़ाल्ऽया।”

१६ परमेस्वरए मिँराए ल्योदा उयुँ ओय़ाल्ऽयाव यायेननी ब माःक, या यापैऽयावनी ब माःक, ओल परमेस्वरए उयुँ स्यानी वाज़ ताऽया। १७ धर्मसास्त्रल परमेस्वरए राजा फारोलाई मनी है दोक्यो,

“नँ नक्याँत डासक्ती सतैँन्याए ज़ूनी

[†]६:१३ छुत बुक्किन्या — एसावलाई माःक, याकूबलाई डारूजिके।

६:७ उत २१:१२ ६:६ उत १८:१० ६:१२ उत २५:२३ ६:१३ मला १:२-३

६:१५ प्रस ३३:१६

नँलाई राजा जैद डानैनिए।
ननी ज़ डामिन संसार भरिल
प्राइँदा ज़ थास्न्या ले।”

१८ है जैद जोए ल्योदा परमेस्वरए
उयुँ नान्या पैँज्याव, होए ल्योदा उयुँ
नाज़्या। फरी जोलाई परमेस्वरए
खाव जैन्या पैँज्याव, होलाई खाव ज़
जैज़्याव।

कुमाल्या सोनो गमए जा

१९ जे ख्वाराए है जेलिज़्याखेहो,
‘ओल ज़ नै ओराजैव ताकिन ते कै
जैद यागलती थरैद ओराएज़्याव?
परमेस्वरए मिँरालाई गोइँद ओरा-
एज़्यावकिन सुए ची तँदा ओलॉ-
धुरिज़्याव?’ २० डा ते भन है
डादाचिज़्या, ए निताव पाँज़्याव मिँ,
नँ कै जैद परमेस्वरस या: नदोज़्याव?
गम जाए ब ओक्याँ जैज़्यावलाई,
‘डालाई काराव अइ नजैनाव?’
है मादोव। २१ नो गम जा जैज़्याव
कुमाल्याए जो मिताव ओजैदी ब
ओल ओमाहाँ ज़ लिज़्या। ख्वारालाई
बनै घेप्पा, याए: ल्योर याजैज़्याव,
ख्वारालाई अइज़ तके दँकावर
याजैज़्याव। २२ परमेस्वरए ओयेन ब
हिताव ज़। उरिस चोवराए याक्याँत
उरिसलाव सक्ती सतैँन्या ब ओल

ओमाहाँ ज़ लिज़्या। हैदी मनी नोर नास
दैन्याकावर यालिदी ब नोराए याक्याँत
उरिस थामिउ ज़ नैज़्याव। २३ है जैद
निताव उरिस चोवरालाई मनी हैज़
ओराजैकिन, उयुँ नावरालाई भन कै
जैद ओदया सतैँद मारायोके? नोरालाई
ते डादाकिन ज़ ओज़गै दैन्यार ब जैद
ओरानैज़्याव। २४ गे ओछॉँतिसिउर ब
उयुँ नावर ज़ गेलिज़्या — यहूदीर वाज़
मा:क, जे छुत जातलावर ब जेलिज़्या।
२५ अगमबक्ता होसेए मनी परमेस्वरए
ओपाँ अइ लिद सर्द नैव,

“डामीर मातावर

डामीर ज़ डाराजैरिज़्या।

डामन मालागिउरालाई डामन
लागिउर डाराजैरिज़्या।”

२६ सोनो,

“ ‘जे डामीर मा:क’ है ओरादोव
पोल

भन नल ज़ ‘जींदो परमेस्वरए
ओज़ार ज़’ है दान्या लेर।”

२७ यसैयाए मनी इस्राएलीराए जूँनी अइ
लिद सर्द नैव,

“इस्राएलीर समुन्द्रलाव बालुवा
स्यासो मागनिसिधुन्यार
यालिदी ब,
छ्या वाज़ परमेस्वरए ओड़ाक
थरिन्या लेर।

२८ परमेस्वरए आव मानुवात
ओपाँ चाँदो ज़ छत्कैद
सयो-रिज़्याव।”

२९ फरी तोथोल यसैयाए किताव
ओसरो, हिताव ज़ तान्या ले —

“गेथोर माहान परमेस्वरए
तोबो नेब्लो बाँचैद
ओमायासिउ ताकिन,
सदोम सोनो गमोरालाव स्यासोर
तान्या गेल्यो।”

इस्त्राएलीराए परमेस्वरस खैन्या येम
यामादैव

३० डा है डालिज़्यावए ओअर्थ
आव ज़ — यहूदीकिन छुत जातलाव
मिँराए परमेस्वरए ल्योदा बान्या येम
यामाखिम्दी ब, परमेस्वरए ल्योदा
यायुँ यासुहुबोनी भन, नो येम ज़
दैकेर। ३१ यहूदीराए ते परमेस्वरए
ल्योदा बान्या येम डादाकिन ज़
कानुन भैःद दान्यानी याखिम्दी ब
मादैकेर। ३२ काराव यामादैव? काराव
ल्यो ताकिन नोराए युँ हुप्य्यानी
यामाखिम्ज़्याव, कानुनलाव येननी
वाज़ याखिम्ज़्याव। है जैद नोर
धर्मसास्त्रलाव सर्सिउ ‘सुतुम्या
लुँत’ पर्दपद यापाव मिताव ज़ ताके।
३३ नलाव सर्सिउ आव ज़,

“डा सियोनलाव डाराज्याल
मिँराए यायुँ केःदयान्या
सुतुम्या लुँ थाँद डानै।
नो लुँत यायुँ हुप्य्यावर
लाज मोर्नो तान्या मालेर।”

१० अ डानै डामेर, डा डाभेरा
यहूदीराए जूँनी पोंखारिद,
‘परमेस्वरनी बाँचिउ यादैकिन ताखेहो’
है डालिज़्या। २ नोर परमेस्वरए ल्योदा
बान्या बनै धामा दोज़्यार लिन्या ते
डासैज़्या। खाली चावस माबुभिद
अत्ताकल ज़ दोज़्यार। ३ परमेस्वरए
मिँरालाई ओल्योदा ओरासखैज़्याव
येम माप्राल्धुद यानी ज़ सखैसिउ
पैद परमेस्वरए ओयेमल माहुकेर।
४ ख्रीसए ओयेन उसुदुमोए कानुननी
बान्या येम तुपिके। है जैद ओललाई
यायुँ हुप्य्याव भरी ते परमेस्वरस
खैवर ताज़्यार।

५ कानुनलाव येननी परमेस्वरस
खैन्याए जूँनी मोसाए अइ लिद सर्द
नैव,

“कानुनलाव येन माबिरैद
दोज़्याव मिँ वाज़ बाँचिज़्या।”

६ युँ सुहुप्य्यानी परमेस्वरस खैन्याए
जूँनी ते इताव सर्सिउ लिज़्या,

“जे, ‘स्वर्गत बान्या सुए ची
उधुरिज़्याव,’ है तालिच्यो।”

(अथवा, 'गे ख्रीसलाई स्वर्गतिन मेल
गेमारैधुइ' है ल्यो मापरिए।) ७सोनो,

“जे, 'खादरल बान्या
सुए ची उधुरिज्याव,'
है ब तालिच्यो।”

(अथवा, 'गे ख्रीसलाई सिउनी
गेमासोचोइधुइ' है ब ल्यो मापरिए।)
८बुरू 'आव चेतैव ताके' है लिन्या
सर्सिउ लिज्या,

“ओपाँ जेकिन तादाड माले।
ओपाँ जेयुँल ज़ लिज्या,
जेया:त ज़ लिज्या।”

नो पाँ फरी गे गेसथैचिज्याव युँ
सुहुप्य्या चाव था ज़। ९जेया:त 'येसु
ख्रीस ज़ गेप्रभु' लिद जेपाँकिन, सोनो
जेयुँल 'परमेस्वरए ख्रीसलाई सिउनी
सोचोइक्यो' लिद जेयुँल जेपतिकिन
बाँचिन्या जेले। १०गेयुँए ज़ परमेस्वरए
ओपाँलाई गेयुँ हुपद ओलस गेखैज्या,
फरी नो गेयुँलाव पाँलाई गेया:ए
पाखात पाँद गेबाँचिज्या। ११नो धर्म-
सास्त्रलाव 'ओल्योदा उयुँ सुहुप्य्याव
मिँ लाज मोर्नो तान्या माले' है लिन्या
पाँ १२यहूदीरालाई मनी लिज्या,
छुत जातलावरालाई मनी लिज्या।
परमेस्वर तोबोका तोबो ओतावए
प्राइँए परमेस्वर ज़ लिज्या। जो जातए

तादी ब ओललाई खिम्ज्यावरालाई
ओअसिकर थुद याएज्याव। १३धर्म-
सास्त्रल मनी, “जोए परमेस्वरए उमिन
हाइद परमेस्वरलाई खिम्ज्याव, हो
बाँचिन्या ले,” लिद सर्सिउ लिज्या।

१४खाली परमेस्वरलाई यायुँ यामा-
सुहुप्य्याव परमेस्वरलाई कातानी ची
याखिम्रिज्याव? सोनो, परमेस्वरए
ओपाँ थैव यामादैकिन कातानी यायुँ
यासुहुप्य्याव? सोनो, सथैन्या
मिँ याल्योदा ओमाबाकिन कातानी
याथैरिज्याव? १५सथैन्या मिँलाई
सुवाराए यामापरीकिन कातानी
ओबाधुरिज्याव? निताव बाज्यावराए
जुँनी धर्मसास्त्रल मनी अइ लिद
सर्सिउ लिज्या,

“चाव था रैद हुज्याव मिँलाई
रै:द,
प्राइँए यायुँ होलाँ ताद रेंज्यार।”

**इस्राएलीराए 'गेमाथैए' है लिन्या
निउँ ज़ माले**

१६हितावत मनी इस्राएलीर जाँकोसैए
चाव था थैन्या युँ ज़ मादोकेर।
यसैयाए मनी अइ लिद सर्द नैव, “अ
परमेस्वर, गेरासथैव पाँत सुए यायुँ
ज़ माहुप्य्याके।” १७है जैद थैद वाज़

युँ हुप्ज़्या — नो थैऩ्या ते ख्रीसए ओपाँ
ज़। १८हितावत ब नो परमेस्वरए
ओपाँत यायुँ माहुबो इस्राएलीराए
‘गेमाथैए’ लिन्या काता निउँ ज़ माले।

धर्मसास्त्रल मनी इताव सर्सिउ लिज़्या,
“परमेस्वरए ओपाँ सथैऩ्यावराए
यार्गा

संसार भरिल थास्द ले।
यापाँ ब काना कुनीड पै
केस्द ले।”

१९हिताव ताकिन इस्राएलीराए यामा-
बुफिउ ते माःक। नोराए जूँनी मोसाए
डादा ज़ अइ लिद सर्द नैव,

परमेस्वरए है लिज़्या,
“छुत जातलाव मिँरालाई रँःद,
जेमी तून्या डाजैचिरिज़्या।

डामिन मासैऩ्यावराए याल्योनी
जेरिस ब सोचोइद
डायाचिरिज़्या।”

२०यसैयाए ओपाँ भन ज़ कर्रा जैद
इतावनी ज़ सर्द नैद यायो,

“डालाई खिम ज़ माखिमिज़्यावराए
ल्योक डसरैःसिके।

पजै ज़ मापजैऩ्यावरास
डादैसिके।”

२१खाली इस्राएलीराए जूँनी ते इताव
ज़ लिज़्या,

“जे बनै अखत्यासो मामुइलिउ
मिँरालाई
‘हुचिके’ लिद डाकुइ थॉद नैद
डायाचिक ब जेमाहुके।”

परमेस्वरए उमीं इस्राएलीरालाई
मारारासो

११ हितावत मनी उमीं
इस्राएलीरालाई परमेस्वरए
मारारासो। डा मनी इस्राएली
ज़, अब्राहामनिकाव बेन्यामीनए
ओथोलाव मिँ ज़। २परमेस्वरए
डादाकिनकाव थःरैद ओरानैऩ्याव
उमींरालाई मारारासो। आवए उजूँनी
धर्मसास्त्रलाव सर्सिउ एलियाए
ओपाँ ब तखेप चिऊव ताके। नोए
इस्राएलीरालाई रँःद बनै हार मानिद
अइ लिद पाँके,

३“अ परमेस्वर, नअगमबत्कारालाई
यारासैःकेर।

नँलाई चरैःन्या थानर ब
यारातैःकेर।

बाँचिउ डा वाज़ डालिज़्या।

डालाई ब सैःन्याए जूँनी
खिमो ज़ नैनाऩ्यार।”

४परमेस्वरए ओजवाप फरी अइ लिद
हुके,

“माःक, बाल देवताए ओसेवा
मादोज्यावर सात हजार
डामींर लिज्यार।”

५हो मिताव ज़ आज्याल मनी
इस्नाएलीराए खार्ल परमेस्वरए
ओदयानी ओराछाँतिउ उमींर अभ
लिज्यार। ६खाली नोर या यादोव
येननी मातार, परमेस्वरए ओदयानी
वाज़ ताकेर। हिताव ओमाताव
ताकिन दया ते अनाकलाव ज़ तान्या
ओल्यो।

७है जैद इस्नाएलीराए यानी ज़
परमेस्वरए ओयेम खिम्द ते मादैकेर।
याखार्लाव परमेस्वरए ओराछाँतिउराए
वाज़ दैकेर। उपुर्कावर भन ज़ यायुँ
खाव तानाके। ८धर्मसास्त्रल मनी
इतावनी सर्सिउ लिज्या —

“परमेस्वरए नोरालाई इल्द
लिज्याव मितावर ज़
याजैक्यो।

यामी लिज्यावत ब मारैःधुर,
याना लिज्यावत ब माथैधुर।
आज्याल पै ब हिताव ज़
लिज्यार।”

९हो मिताव ज़ दाऊद राजाए ब अइ
लिद सर्द नैव,

“नोराए याभत्यार ज़ याघुर्धुम
ओताक,

नोर नल ज़ तेद सजा ओदैरक।

१०यामी मारैःद छाम छामोर
ओतारक।

नोराए यावाँः एकम्या घोंत्यासो
ज़ उलिक।”

**परमेस्वरए ओपाँ छुत
जातलावरालाई ब ताके**

११डा जेलाई है डादाचिज्या,
इस्नाएलीर तुम्द धलिउका धलिउ
याताव ते माःक। नोराए बुरू
परमेस्वरए ओपाँ यामाभैःवए
परमेस्वरए ओपाँ छुत जातलाव मिँराए
ल्योक ब हुके। ननी ज़ परमेस्वरए
इस्नाएलीरालाई यामी तून्या याजैक्यो।
१२नोराए परमेस्वरए ओपाँ माभैःद
तँदा याबावनी परमेस्वरए ओअसिक
संसार भरिल राःसिद छुत जातलाव
मिँराए ल्योक ब ओबावए, नोर या
मनी याभैःवत प्राइँलाई भन ज़ चाव
ताया।

१३-१४आव पाँ भरी जे यहूदीकिन
छुत जातलाव मिँरालाई है डादाचि-
ज्या। परमेस्वरए डालाई जेल्योदा
ओल ओपाँ सथैन्यात ओसाची परींद
नैनाव। हो ताकिन कसा डाभेरा
यहूदीर जेस खिस्द यायुँ परमेस्वरए
ल्योदा माफकैर लिद जेस डादोज्याव

येन नोराए याडाक बनै डासघ्योःज्या।
 १५परमेस्वरए नोरालाई ओरासोनी
 मानुवाताव मिँरालाई ओनैर
 ओराजैवए, नो ओरासोरालाई फरी
 ओरारैकिन सिउनी ओरासोचोइव
 मितावर ज़ ताखेरहो।

इस्राएलीराए यासजा रैःद सघ्योःसिन्या माःक

१६मुछिसिउ कनेनी तोचोप परमेस्वर-
 लाई चरैःकिन कने भरी पाईं ज़
 चोखो ताज़्या। हिताव ज़ सीए
 ओजरा चोखो ओताकिन ओखार
 भरी ब चोखो ज़ ताज़्या। १७हितावत
 ब रूवा यहूदीर जैतून सीए ओखार
 च्रमिसउ मिताव ज़ लिज़्यार। जे छुत
 जातलावर फरी ज्याँलाव सीं स्यासोर
 जेल्यो। परमेस्वरए जेलाई रैद जैतून
 सींए ओक्याँत जोरैद ओरस दैन्या
 जैचिक्यो। १८है जैद नो डादाडाव
 खारराकिन जे तास०च्यो। जे खारराए
 जरालाई अदैद जेनैज़्याव माःक,
 जरए ची जेलाई अदैद नैचिउ।

१९जे है जेलिज़्याखेहो, “नो च्रमिसउ
 खारराए पोल परमेस्वरए गेलाई ची
 ओजोरैसिउ ओल्यो।” २०नो ते साचो
 ज़, नोर यायुँ ओमाहुबोए परमेस्वरए
 सींतिन याच्रमक्यो। खाली जे ते जेयुँ
 उहुबोनी वाज़ जोरैसिउर जेताके।
 है जैद जे छेःद लिचिके, तास०च्यो।

२१परमेस्वरए साचो ओखाररालाई
 बाँखी ओमारानैकिन जेलाई मनी
 बाँखी नैन्या माले।

२२ननी ज़ परमेस्वरए उरिस ब
 रैःज्या, ओदया ब रैःज्या। नो च्रमिसउ-
 रालाई उरिस ताके, जेलाई ओदया
 ताके। खाली जे ओदयाल ल्यो
 ज़ ताके, मानी जेलाई मनी च्रमन्या
 ओछ्यास लिज़्या। २३नो च्रमिसउर
 फरी यायुँ उहुपिकिन परमेस्वरए
 नोरालाई डादाडाव यापोल ज़ जोरै-
 धुन्या ब ले। २४जे छुत जातलाव
 ज्याँलाव सीं स्यासोरालाई रैद चाव
 सींए ओक्याँत ओजोरैचिउए, साचो
 ओखाररालाई भन या यासींत कै जैद
 माराजोरैवके?

इस्राएलीराए परमेस्वरए ओयेम दैन्या लेर

२५अ डानै डामेर, जेलाई तोबो
 कप्सिउ पाँ सतैद डायचिरिज़्या।
 नो पाँ जेसैकिन यहूदीराकिन
 सघ्योःसिन्या जेमाले। नो पाँ आव
 ज़ — परमेस्वरए ओराज्याल छुत
 जातलाव मिँर यामादुमा पै वाज़
 इस्राएलीर परमेस्वरए ओपाँकिन तँदा
 तान्या लेर। २६हाःकिन इस्राएली
 भरिए परमेस्वरए ओयेम दैद बाँचिन्या
 लेर। धर्मसास्त्रल मनी इताव सर्सिउ
 लिज़्या,

“बाँचैऽयाव सियोननी हुरिऽया,
याकूबए ओथोनी अधर्मलाव येन
भरी ब हाइदयान्या ले।

२७ डा नोराए यापाप हाइद डारायोत
डाबाचा भरी नत ज़ योऽन्या ले।”

२८ आज्याल ते नो इस्राएलीर आव
गेरासथैऽयाव चाव थानी ते
परमेस्वरए उसुतुर मितावर ज़
लिऽयार। ननी ज़ जेलाई फाइदा ब
ताके। खाली यासाखा पुर्खारालाई
परमेस्वरए ओरायो याकानी ते उयुँ
नावर ज़ लिऽयार। २९ परमेस्वरए
ओयाकालाई खर्क ज़ फिस्को माजैव,
ओराछाँतिउ उमीरालाई ब मारासो।

इस्राएलीरालाई ओरासो ओलेखा
ल्यो ज़ ताके

३० डादा जे छुत जातलाव मिंराए
परमेस्वरए ओपाँ जेमादोऽयाव।
हितावत ब इस्राएलीराए परमेस्वरए
ओपाँ यामाभैऽवए जे परमेस्वरए
ओदया दैन्यार जेताके। ३१ नोर मनी
परमेस्वरए ओपाँ यामाभैऽदी ब, जे
परमेस्वरए ओदया जेदैवए तछा
नोराए मनी दैन्या लेर। ३२ परमेस्वरए
ओदया सतैन्याए जूनी प्राइँलाई यामन
लागिउदा तखेप यारास्ऽयाव।

३३ परमेस्वरए ओगहक उबुद्धी बनै
अचम्बलाव लिऽया। परमेस्वरए
ओथऽरैव पाँलाई सुए ज़ मापल्लैधुर,
ओदोऽयाव येन ब सुए ज़ माथऽरैधुर।

३४ धर्मसास्त्रल ब अइ लिद सर्सिउ
लिऽया,

“परमेस्वरए उयुँलाव पाँलाई
थऽरैन्या सु ची उलिऽयावदा?
नोलाई सल्ला यान्या
सु ची उलिऽयावदा?”

३५ “परमेस्वरए सुए ल्योनी ची लोस्द
लोइ धूँल उलिऽयावदा?”

३६ ताऽयाव भरी ओल ओल्योनी ज़
ताऽया, ओल उजूनी ज़ ताऽया, ओल
उमीर ज़ ताऽया। है जैद परमेस्वरलाई
खर्क ज़ माखेऽन्या ज़गै मगैव ओताक।
आमेन।

जेक्याँ परमेस्वरए उमीं ज़ जैव ताके

१२ है जैद डानैँ डामेर, परमेस्वरए
जेलाई उयुँ नावर जैद
ओदयार सतैँद ओयाचिउए आव
तोबो पाँत डाबिन्ती लिऽया — जे
परमेस्वरलाई ओऽयास्ऽयाव मिताव
येन छैँवनी दाद, जेक्याँ भरी ओललाई
चरैऽचिके। परमेस्वरए साचो ओसेवा
दान्या ननी ज़। २ आव जुकलाव

लन्थादा जेयुँ ताभाःच्यो। बुरू जेयुँलाई तोद साःरो जैचिके। हो ताकिन वाज्ज परमेस्वरए काता ओपैज्याव हो सैन्या जेले। है जैद काताकाव चाव उलिज्याव, परमेस्वरलाई काताए खुसी ओजैज्याव सोनो पक्का काता उलिज्याव, हो ब चबनै सैन्या जेले।

परमेस्वरए ओयाचिउ येन चावस ज़ दाव ताके

३परमेस्वरए डाल्योदा उयुँ ओगराँवए ज़ जे पाईलाई है डादाचिज्या — जे तास०च्यो। बुरू मासघ्योःसिद परमेस्वरए ओयाचिउ युँ हुप्या खावाकाव जेस उलिज्याव हाःवाकाव ज़ जेक्याँलाई थःरैच्यो। ४किताव गेक्याँताव गेखँ गेकुइर छुत छुत ताद सु सु यायेन ब लिज्या, ५हिताव ज़ गे ख्रीसए उमिनतावर छुत छुत गेलिदी ब ख्रीसनी तक्याँ ज़ गेताज्या। ६है जैद परमेस्वरए ओयासिउ गोईनी सु सु गेबरदान छुत छुत ओतावए हो मितावनी ज़ दोव ताके। परमेस्वरए उपुरूसनी पाँज्यावए परमेस्वरए ल्योनी ओदैव गोईनी ज़ ओपाँक। ७सेवा दाज्यावए सेवा ज़ ओदोवक। परमेस्वरए ओपाँ पैज्यावए ओसैव भरी ओरापैवक। ८परमेस्वरए

ओपाँत यायुँ सभेःदचाज्यावए भन ज़ सभेःद ओरायोक्। याज्यावए उकुइ सघ्योःद ओरायोक्। हक दैवए गहकस येन ओचलैवक। उयुँ नाज्यावए उयुँ माकैद ज़ ओदोवक।

खैद लिन्या

६जे जेल खैन्या साचो युँनी ज़ ओताक। माचाव पाँलाई सोद, चाव पाँत खदेप ल्यो ताके। १०जे तोबो फूलाव मितावर जेतावए जे जेल समारिसिउ ताके। जे जेल क्याँकिन छुतए ओमान ब नैच्यो। ११परमेस्वरए ओसेवा धेङ्गै मादाद छैव पुरूसनी कलँ लिद दोच्यो। १२परमेस्वरनिकाव जेदैव आसत रेंद ज़ लिच्यो, दुखलाई सहिच्यो, एकन्या पोंखारिउ ज़ नैच्यो। १३परमेस्वरए उमिनताव जेनेँ जेमंरालाई माथैव मायोःवल यारासघैच्यो। जेफिमक हुव पाहुनारालाई चावस यारानैच्यो। १४जेखिरी पसिज्यावरालाई ताराथल्ल्यो, बुरू परमेस्वरए ल्योनी असिक याराएच्यो। १५रेंज्यावरास रेंचिके, घर्ज्यावरास घर्चिके। १६जे जे खैद लिच्यो। मासघ्योःसिद, जिम्जारास मनी खदेप लिच्यो। ‘जे वाज्ज बनै सैन्या’ ताजैसिच्यो। १७माचावलाई माचाव फकैद ताएच्यो। जेदोज्याव भरिल

जेपाँःच्या तापुलुस्क। १८जेधुवा भरी प्राइँ मिँरास खैद लिच्यो। १९डानैँ डामेँर, सुए ओक्याँत ज़ जेखिस ताफेरैच्यो। बुरू नो पाँ परमेस्वरलाई याद ओलस ज़ नैचिके। धर्मसास्त्रल मनी इताव सर्सिउ लिज़्या,

“परमेस्वरए है लिज़्या,
खिस फेरैदयान्या डा डालिज़्या।”

२० “जे ते जेसुतुर ओकरेकिन
ओकरे सैःदिचिके।

री ओछोस्किन उरीछो सैःदिचिके।
ननी ज़ ओडैनी भुबुराए जेरालो
मिताव तान्या ले।”

२१ है जैद माचावलाई माचावनी
हारैऱ्या माःक, माचावलाई बुरू
चावनी हारैऱ्या ची।

सरकारए ओकानुन भैःऱ्या

१३ प्राइँ ज़ घेप्पा हक दैवराए
धूँल उलिरक। हक भरी
ओल परमेस्वरनी ज़ हुज़्या। हक
दैवर मनी परमेस्वरए ओराखतैवर
ज़। २ है जैद हक दैवराकिन जो तँदा
जैसिज़्या, हो परमेस्वरए ओपाँकिन
तँदा ओजैसिउ मिताव ज़ लिज़्या।
नितावराए परमेस्वरनी सजा दैऱ्या
लेर। ३ चाव येन दाज़्यावर हक दैवराए
ल्योनी छेःव मापरिए, माचाव येन

दाज़्यावर वाज़ छेःव परिज़्या। है जैद
हक दैवरालाई रँःद माछेःद लिऱ्या
ताकिन चाव येन ज़ दोव ताके। हो
ताकिन ची सजाए ओपोल ‘स्याबास’
दैऱ्या जेले। ४ होए जेजूनी परमेस्वरए
ओखतैव येन दोज़्याव। है जैद माचाव
येन दान्यात छेःच्यो। हक दैव मिँए
ओतरवाली अइज़ सतैद नैसिउ वाज़
माःक, परमेस्वरए ओयेन ज़ दोज़्याव।
माचाव येन दाज़्यावए ओक्याँत
परमेस्वरए ओसजा सयोःदिज़्याव।
५ है जैद हक धूँल ल्यो ज़ परिके —
खाली सजा रँःद वाज़ माःक, ‘आव
येन ज़्यासो ज़ लिज़्या’ लिद दोव ताके।
६ सरकारए ल्योदा सिर्मा जेफोःक ब
नो पाँ चेतैव ताके। सरकारए ओयेन
दाज़्यावराए प्राइँए जूनी परमेस्वरए
ओयेन ज़ दोज़्यार। ७ है जैद याव
परिऱ्यालाई एचिके। सिर्मा फोःऱ्याल
सिर्मा फोःचिके, दोरो फोःऱ्याल दोरो
फोःचिके, छेःव परिऱ्याल छेःचिके, मान
नैव परिऱ्याल मान नैचिके।

छुतलाई समारिऱ्यानी ज़ कानुन
योःज़्या

८ काताए ओभार धूँल ब तालिच्यो।
खाली जे जेल खैद समारिसिऱ्या भार
वाज़ ओताक। छुतलाई समारिऱ्यानी

परमेस्वरए ओकानुन ब योऽया।
 ६परमेस्वरए ओकानुनल, “अर्काए
 ओज्याए ल्योदा माबान्या, मिँ
 मासैःन्या, माकुन्या, लोभ मादान्या,”
 लिद सर्सिउ लिज्या। आव पाँर सोनो
 उपुर्काव कानुनलाव पाँ भरी ओपोःस
 ज़ आव तोबो पाँत थोम्सिज्या —
 “जेक्याँलाई किताव जेसमारिज्या,
 छुतलाई ब हिताव ज़ समारिउ
 ताके।” १०छुतए ल्योदा उयुँ थू जैद
 समारिज्याव मिँए सुलाई ज़ माबलेःव।
 है जैद छुतलाई समारिन्यानी ज़ कानुन
 भरी योऽया।

नम सँन्या बेला हुद ले

११है जैद बेला सैद, है डादाचिउ भरी
 दोचिके। ड़ल्द लिन्या माःक, सैसिद
 लिच्यो। परमेस्वरए ओपाँल गेहुव
 छचामकिन ख्रीस उहुन्या छचाम
 नजिक हुद ले। १२री कुधु बाधुके, नम
 सँन्या बेला हुके। है जैद चुम चुमोलाव
 येन भरी रास्द ज़गैवलाव येन दोव
 ताके। १३पलाँवल ओसहिज्याव
 मिताव ओतह ल्यो येन दोव ताके —
 तुबुरी दुलिद राउँनी भयाउँ लिन्या
 ब माःक, मँःन्या ब माःक, पातऱ्या
 पातर्नी जैसिन्या ब माःक, कोभादा
 बान्या ब माःक, मी तूद इंसिन्या ब

माःक। १४बुरू नोए ओपोल गेप्रभु
 येसु ख्रीसए ओगे रैद, डादाडाव जेयुँ
 मानैधुद माचाव जेखिमो भरी वैद
 उमिन समैदचाव ताके।

छुतए ओपाँलाई सज़िन्द मायान्या

१४ चाव माचाव माछुतैधुज्याव-
 लाई सुमच्यो, ओपाँलाई
 सज़िन्दचाद इंसिन्या ताजैच्यो।
 २ख्वाराए ज़ान्या भरित यायुँ हुद
 ज़्युज्यार। ख्वाराए फरी यायुँ जाँ
 ओमाहुबोए स्याकरी माकैर। ३नो प्राइँ
 ज़्युज्यावए माज़्युज्यावलाई तासोवक।
 हिताव ज़ फरी माज़्युज्यावए प्राइँ
 ज़्युज्यावलाई, ‘माज़्यान्या ज़्युक्यो’
 है तादोवक। परमेस्वरए नेथोलाई
 ज़ उमीर जैद यानैव। ४अर्काए
 ओबाँदालाई फाल्न्या नँ सु? नोए
 ओदोऽयाव येन चाव सै माचाव लिद
 फाल्न्या ओसाहुए ची। है जैद ओयेन
 थःरैदचान्या ओर्गे परमेस्वरए ची। होए
 ज़ नोलाई चाव येन दान्यात सघैऽयाव।

५ख्वाराए उपुर्काव छचामकिन
 तोबो छचामलाई घेप्पा जैऽयार।
 ख्वाराए फरी प्राइँ तोबो ज़ थःरैऽयार।
 जो मितावनी तादी ब सु सु युँल ज़
 थःरैव ताके। ६नो तोबो छचामलाई
 घेप्पा मानिज्यावए मनी परमेस्वरए

उजूनी ज़ दोज़्याव। प्राइँ ज्युज़्यावए मनी परमेस्वरलाई धन्याबाद चरैःद ज़ ज्युज़्याव। स्याकरी माकैज़्यावए परमेस्वरलाई चेतैद ज़ माकैव। होए ब परमेस्वरलाई धन्याबाद चरैःज़्याव।

७गे सु मनी गेजूनी गेमाबाँचिए, सु मनी गेजूनी गेमासिए। ८गेबाँचिदी ब परमेस्वरए उजूनी ज़ गेबाँचिज़्या, गेसिदी ब परमेस्वरए उजूनी ज़ गेसिज़्या। है जैद जुनी ब उमीर ज़ गेलिज़्या। ९ख्रीस सिउ मासिउराए गेप्रभु तान्याए जूनी ज़ सिद सैसिके। १०हिताव ताकिन ते जेसकाव जेभाइए जाँ छुत येन ओदोक काराव माचाव जेडम्सिज़्याव? काराव स०द नोलाई जेसज़िमज़्याव? गे प्राइँ ज़ परमेस्वरए ओड़ाक च्याँःसिद तछा गेफाल्सिरिज़्या लिन्या चेतैच्यो। ११धर्मसास्त्रल मनी अइ लिद सर्सिउ लिज़्या,

“प्रभुए है लिज़्या,
डा साचो है डालिज़्या,
मिँ भरी प्राइँ डाड़ाक
फुलुप्सिन्या लेर।
प्राइँए परमेस्वरए उमिन
सघ्योःन्या लेर।”

१२है जैद गे भरी प्राइँ सु सु गेयेन परमेस्वरलाई है दाव परिरिज़्या।

छुतए उयुँ केःद मायान्या

१३है जैद जे तोबोए तोबोलाई ओयेन गलती थःरैद ताएच्यो। बुरू छुतलाई उयुँ केःदयान्या पाँ मादान्या थःरैव ताके। १४गेप्रभु येसुलाई डायुँ उहुबोए डा है डालिज़्या, माज़्यान्या काता ज़ माले। हैदी ब जोए उयुँल, ‘आव ते माज़्यान्या ज़’ लिद थःरैज़्याव, नोलाई माज़्यान्या ज़ लिज़्या। १५है जैद नोलाई ज़्यावए जूनी उयुँ केःद जेएकिन नोलाई मया जेमादोव मिताव ज़ ताके। है जैद ख्रीसए उजिउ भ्नाःद ओयो मिँलाई जे ज़्यान्यानी परमेस्वरए ओपाँत ओजाँगर सैःद ताएच्यो। १६है जैद जे जो चाव जेथःरैज़्या, हो छुतए माचाव है ल्यो तादैवक। १७परमेस्वरए ओराज्यालाव पाँ ज़्यान्या ओन्याए जूनी माःक। नो पाँ ते आव ज़ — परमेस्वरए उयुँलाव मिताव येन दान्या, खैद लिन्या, सोनो छैँव पुरूसनी युँ होलाँ दान्या। १८जोए नितावनी ख्रीसए ओसेवा दोज़्याव, हो परमेस्वरए उयुँलाव मिताव ब ताज़्या, मिँराए याजाँगर हुव ब ताज़्या।

१९है जैद जे जेल खैद प्राइँलाई सपारैन्यात उदिम दोचिके। २०परमेस्वरए ओयेनलाई ज़्यान्यानी ताबलेच्यो। ज़्यान्या भरी प्राइँ चोखो

उलिदी ब जोए ज़्याद ओद ओभाइलाई उयुं केःद ओएकिन, नोलाई माज़्यान्या ज़ पाथ लिज़्या। २१नो जेभाइलाई जेबलेःज़्याव देखा बुरू स्याकरी माकैन्या, सोनो मद छोकोरा माओन्या पाथ लिज़्या।

२२है जैद दान्या जेथःरैव भरी परमेस्वरए ओड़ाक जेयुंल पक्का ज़ थःरैव ताके। जोए ओथःरैव पांत उथुपुल ओमालिकिन नोलाई पाथ लिज़्या। २३खाली जोए सङ्गा दाद उज़्युकिन ओलनी ज़ ओखत ल्यो थःरिज़्या। युं माहुपद दान्या भरी पाप ज़ लिज़्या।

छुतलाई सपारैन्या

१५ गे परमेस्वरए ओपांत थःरिउराए चाव माचाव माछुतैधुज्यावराए यापां सहिदचाव ताके। क्याँलाई तान्या वाज़ दान्या माःक। २गे प्राइँए छुतलाई सपारैन्याए जूनी ओललाई तान्या येन दादचाद खुसी जैव ताके। ३ख्रीसए मनी ओललाई तान्याए जूनी मादोक्यो। हिताव ज़ धर्मसास्त्रल ब अइ लिद सर्सिउ लिज़्या,

“नँलाई याथल्लिउ भरी
डा डाक्याँत ज़ हुद ले।”

४नो भाःडाव धर्मसास्त्रलाव सर्सिउ भरी गेजूनी ज़ लिज़्या। ननी ज़ येन भरी पैसिद गेयुँर होलाँ ओताज़्यावए दुखर उहुदी ब ननी ज़ थःरिद गेआस लिज़्या। ५है जैद युं होलाँ जैदचाद थःरिउ जैज़्याव परमेस्वरए, येसु ख्रीसए उमीर जेतावए जेलाई तयुं ओजैचिउक। ६हो ताकिन ची जे प्राइँए ज़ तयुं तपाँ जैद गेप्रभु येसु ख्रीसए ओबाबु परमेस्वरलाई उमिन सघ्योःदचान्या जेले।

जे जेल सुम्मिचिके

७है जैद जे परमेस्वरए उमिन सघ्योःदचान्याए जूनी किताव ख्रीसए गेलाई सहिद उसुम्मिउ, जे जेल ब सुम्मिचिके। ८डा जेलाई है डादाचिज़्या, ख्रीसए मनी यासाखा पुर्खारालाई परमेस्वरए ओरायो याका भरी साचो ज़ थःरैदचान्याए जूनी यहूदीराए यासेवा दान्या जैसिहुके। ९छुत जातलावराए मनी ‘परमेस्वरए ओदया गेलाई ब ताके’ लिद उमिन सघ्योःदचान्या लेर। धर्मसास्त्रल मनी अइ लिद सर्सिउ लिज़्या,

“डा छुत जातलावराए याखाल
मनी
नमिन सघ्योःदचान्या डाले।
नमिनताव भजन ब गैन्या डाले।”



१० फरी तोथोल इताव मनी लिङ्या,
“अ छुत जातलाव मिँर,
परमेस्वरए उमीरास
जे ब रेंचिके।”

११ फरी तोथोल इताव मनी लिङ्या,
“अ छुत जातलाव मिँर,
परमेस्वरए उमिन सघ्योःदिचिके।
संसार भरिलाव मिँराए मनी
उमिन ओसघ्योःरक।”

१२ यसैयाए मनी अइ लिद सर्द नैव,
“यिसैएँ ओथोनी तोबो हुरिङ्या।
नो छुत जातलावराए याडैताव ब
तारिङ्या।
नोए ओक्याँत छुत जातलावराए
ब आस दान्या लेर।”

१३ जेलाई मनी नो आस दाद जेनैङ्याव
परमेस्वरए, ओललाई जेयुँ जेसुहुबोए
जेयुँ होलाँ जैद रेंद लिन्या ओजैचिउक।
हो ताकिन ची छैव पुरूसए ओसक्तीनी
जेआस ब भन ज घ्योःन्या ले।

आव डासरो पाँर सम्जैन्याए जूनी ज़

१४ अ डानें डामेंर, जे परमेस्वरए
ओपाँर सैंद, धर्मलाव येनर दाद,
जे जेल जेसुदारैसिङ्याखेहो लिद
डायुँ हुबो ज़ लिङ्या। १५ हितावत
मनी परमेस्वरए डालाई उयुँ नाद

ओखतैनावए जेलाई सम्जैन्याए जूनी
तोबो नेब्लो जाँ नास्न्या मिताव पाँर
सर्द नैद डाय्याचिए। १६ नो ओखतैनाव
येन जे मिताव छुत जातलाव मिँरालाई
येसु ख्रीसए ओपाँ सथैद ओसेवा दान्या
ज़। है जैद नलाव डायेन पुजारी येन
स्यासो लिङ्या। जेलाई छैव पुरूसनी
जेखत माल्यो छैवर जैद परमेस्वरए
उयुँलाव मितावर डाजैचिङ्या।

१७ है जैद परमेस्वरए उजूनी डादो-
ङ्याव डायेनत येसु ख्रीसए उमिनत
डासुनी च्याँःसिउ ज़ लिङ्या।

१८ खाली डा डादोवत माःक, ख्रीसए
डाक्याँताव ओदोव येनत वाज़
सघ्योःद डापाँङ्या। है जैद ख्रीसए
डाक्याँताव ओदोव डायेननी सोनो
डापाँनी छुत जातलाव मिँराए मनी
परमेस्वरए ओपाँ भैःकेर। १९ नो पाँत
छैव पुरूसए ओसक्ती हुद अचम्बलाव
सरेसर येनर ब सतैद याएक्यो। है जैद
यरूसलेमकिन इल्लुरिकन खन्द पै
ख्रीसए चाव ओथा प्राइनी ज़ सथैद
डारानै। २० छुतए ओथालिउलाई पुरा
जैद डामीं डामाजैए। बुरू जोल ख्रीसए
उमिन माथासो लिङ्या, होल ज़
सथैन्या डायुँ लिङ्या। २१ धर्मसास्त्रल
मनी इताव सर्सिउ लिङ्या,

† १५:१२ यिसै दाऊद राजाए ओबाबु ज़।

१५:१० व्य ३२:४३ १५:११ भज ११७:१ १५:१२ यसै ११:१०



“ओथा मादैतावराए मनी
ओललाई रँःन्या लेर,
ओपाँ माथैतावराए मनी
बुभिन्या लेर।”

जेस दैसिन्या डायुँ लिङ्या

२२है जैद परमेस्वरए ओपाँ माथासो
पो पोड सथैन्या डातावए जेल्योदा
हुन्या डामाताप्के। २३अब ते नाः
भरिल सथैन्या डायेन खेम्द डानै।
है जैद डादाकिन ज़ जेस दैसिन्या युँ
डादोज़्यावए, २४डा छीनी स्पेन देसदा
डाबाक जेल्योलाव घ्याँ हुद जेस
दैसिन्या आस डादोज़्या। हो बेलाक
जाँवा लिद गेमयार सैःद ननी डाबाक
डालाई जेसघैनाए सैं है डालिङ्या।

२५खाली डा आथ पाला यरूसलेम-
लाव परमेस्वरए छैव उमिनतावराए
जूनी तखेप नदा डाबाङ्या। २६नलाव
माथैव मायो·वरालाई माकेदोनिया
सोनो अखैयालाव मन्दलीराए डाकुइत
रूप्यार परींद याराएङ्यार। २७नो येन
यायुँ स्यानी ब दोङ्यार, दाव परिन्यानी
ब दोङ्यार। निताव छुत जातलाव
मिँराए परमेस्वरए ओअसिक यहूदी-
राए ल्योनी यादैवए, नोराए मनी
यहूदीरालाई माथैव मायो·वल
यान्या ज़्यासो लिङ्या। २८है जैद डा

नो रूप्यार लाँद डारायोत, स्पेनदा
डाबाक जेल्योलाव घ्याँ डाहुरिङ्या।
२९हो बेलाक खीसए ओयाँङ्याव कुधु
असिकरास जेल्योड हुन्या डाले।

डाजूनी पोंखारिदचाँच्यो

३०अ डानैँ डामेँर, जेस डाबिन्ती
लिङ्या — गेप्रभु येसु खीस सोनो
छैव पुरूसए ओयाचिउ मयानी
डा डादुखराल सघैन्याए जूनी
परमेस्वरलाई पोंखारिदचाव ताके।
३१जेपोंखारिक, डा यरूसलेमदा
डाबाक यहूदियालाव येसुए ओपाँ
माभैःङ्यावरानी कै मै ताताक,
सोनो लाँद डाराएङ्याव रूप्या
नलाव परमेस्वरए छैव उमीरालाई
याचाहिङ्याव मिताव ज़ ओताक लिद
पोंखारिदचाँच्यो। ३२हो ताकिन ची
परमेस्वरए उयुँ ओताकिन डा जेल्योड
डाहुक सिप गेयुँर होलाँ जैद रँन्या गेले।
३३युँ होलाँ जैदचाङ्याव परमेस्वर
जेस ज़ बास ओदोवक। आमेन।

प्राइँलाई जेरो लिङ्या

१६ परमेस्वरए उमिनताव
गेबैनी फिबीलाई सरेसो
डापरींचिङ्या। नोए किंक्रियालाव
मन्दलील परमेस्वरए ओयेनत

यासघैऽयाव। २जे परमेस्वरए छैँव उमींराए दाव परिन्या येन दाद, प्रभुए उमिनत चावस नैच्यो, नोलाई ओचाहिऽयाव भरिल सघैच्यो। ओल ब कुधुलाई सघैद यानैव, डालाई मनी सघैद नैनाव।

३डास येसु ख्रीसए ओयेन दाऽयाव अकिलास सोनो प्रिस्किलानिलाई जेरो है दादयाँच्यो। ४नोनी डाजूनी कोऽाड मानी निजिउ ब भाःकिनी। नोनी निगुन डा वाऽ माःक, छुत जातलाव मन्दलीराए ब प्राइँए ज़ चेतैऽयार। ५नोनी निऽिमकाव दुप्सिऽयाव मन्दलीलाई ब जेरो है दादयाँच्यो। डायुँलाव डानैँ इपेनितसलाई मनी जेरो लिऽया। नो एसिया भरिल प्राइँरानी उस०कत ख्रीसए ओपाँत हुव मिँ ज़।

६जेजूनी सैःसिवा जैसिद जेयेन दोव मरियमलाई मनी जेरो लिऽया।

७डास भयालखानाल ल्यो यहूदी डानैँ एन्ड्रोनिक्स सोनो युनियसनिलाई जेरो लिऽया। नोनी निमिन येसुए ओसाचीराए खार्ल थासो लिऽया। नोनी डाकिन डादा ज़ ख्रीसलाई नियुँ हुबोनी निल्यो।

८प्रभुए उमिनताव डायुँलाव डानैँ एम्प्लीआतसलाई जेरो लिऽया।

९ख्रीसए जूनी गेस येन दोऽयाव

उर्बानस सोनो डायुँलाव डानैँ स्ताखुसलाई पाला जेरो लिऽया।

१०ख्रीसए उमिनत थ०रिउ अपेल्लेस-लाई जेरो लिऽया। अरिस्तोबुलसए उऽिमलावरालाई ब जेरो लिऽया।

११यहूदी डानैँ हेरोदियनलाई जेरो लिऽया। प्रभुलाई यायुँ हुप्ऽयाव नर्किंससए उऽिमलावरालाई जेरो लिऽया।

१२प्रभुए ओयेन कुधु दाऽयाव त्रुफेना सोनो त्रोफोसा डाबैनीनिलाई ब जेरो लिऽया। परमेस्वरए ओयेन सैःसिवा जैसिद दोऽयाव डायुँलाव डाबैनी परसीसलाई ब जेरो लिऽया।

१३प्रभुए उरूजिउ रूफसलाई सोनो ओआमालाई पाला जेरो लिऽया। नोए ओआमा डा ब डाआमा स्यासो ज़।

१४असिंक्रितस, फ्लेगन, हर्मस, पत्रोबास, हर्मास सोनो नोरास लिऽयाव गेदाज्यु भाइरालाई प्राइँलाई ज़ जेरो लिऽया।

१५फिलोलोगस, युलिया, ओलिम्पास, नेरियस, ओल ओबैनी सोनो नोरास लिऽयाव परमेस्वरए छैँव उमींरालाई प्राइँलाई जेरो लिऽया।

१६आव जेरो जे जेल ब मयासं है दासिच्यो। पो पोडाव ख्रीसए ओमन्दलीराए मनी जेरो है दाचिऽयार।

परमेस्वरए ओपाँ बले-ज़्यावरानी
जोगोइसिन्या

१७अ डानैँ डामें, जेस फरी डाबिन्ती तोबो लिज़्या — फातै-ज़्यावरास जोगोइसिद लिच्यो। जेलाई पैसिउ परमेस्वरए ओपाँ तँदा बले-द जेयुँ जेसुहुबोलाई बले-दचाव पैज़्यार। है जैद जे नितावरानी अछतड लिच्यो। १८नोराए गोप्रभु ख्रीसए ओसेवा मादोर, याभूँदीए ओसेवा वाज़ दोज़्यार। यायाःत रग रग जैद लातो गाँदोरालाई यारा-धुतैज़्यार। १९खाली जे ते परमेस्वरए ओपाँ चावस जेदोज़्याव प्राइँए ज़ थैद नैर। होए जूँनी जेस डा बनै खुसी डालिज़्या। है जैद जे चावत बनै सैन्यार ताच्यो, माचावत जेखत माल्योर ताच्यो। २०युँ होलाँ जैदचाज़्याव परमेस्वरए चाँदो ज़ जेसुतुर सैतानलाई जेखँ धूँल रूम्दचा-चिरिज़्याव। गोप्रभु येसुए गराँव उयुँ जेस ओताक।

२१डास येन दोज़्याव तिमोथीए ब जेलाई जेरो है दाचिज़्याव। यहूदी डानैँर लुकियस, यासोन स्नो नो सोसिपात्रोसराए मनी जेरो है दाचिज़्यार।

२२पावलए उजूँनी आव पाँ सदर्याज़्याव डा तर्तियसए मनी जे प्राइँलाई 'प्रभुए उमिननी जेरो' है डादाचिज़्या।

२३डा डालिज़्याव फ़िमए ओर्गे गायसए पाला उफ़िमलाव दुप्सिज़्याव मन्दलीरास जेलाई जेरो है दाचिज़्यार। सहरलाव कोस चलैज़्याव इरास्तस स्नो नो गेभाइ क्वार्तसनी पाला जेरो है दाचिज़्यानी।

२४[गोप्रभु येसु ख्रीसए गराँव उयुँ जेस ज़ ओताक। आमेन।]

खेम्न्या असिकर

२५डा ड़ासथैचिज़्याव येसु ख्रीसए चाव ओथानी जेलाई परमेस्वरए ग्याल गिल मातान्या थ०रिउ जैचिधुज़्याव। नो थात भाःकिनकाव कप्सिउ सुए ज़ यामाबुफ़िताव पाँर सतैँसिउ लिज़्या। २६अजम्बरीलाव परमेस्वरए ओगोइँनी ज़ प्राइँ जातलाव मिँराए यायुँ सुहुपदचाद नो पाँ सभैँःन्याए जूँनी नो डादाडाव सर्सिउ धर्मसास्त्रलाव पाँए ओअर्थ भरी आज्याल छर्लङ्ग ज़ रैँःद याखार्ल थास्के। २७है जैद प्राइँ सैँज़्याव तोबोका तोबो परमेस्वरलाई येसु ख्रीसनी खर्क ज़ माखेम्न्या ज़गै मगै ओताक। आमेन।